



C. 105

CAROLI STRACK

MED. DOCT. ET IN UNIVERSIT. MOGUNT. PRAXEOS
MED. PROF. PUBL. ET ORD., EMINENT. AC. CELS.
PRINC. ELECT. MOG. CONSIL. AUL. ET REGIM.
ELECT. UTIL. SCIENT. ACADEM. ERFORD.
REGIAE SOCIET. MEDIC. PARISI. ET
PRINC. HASSIACAE SOCIET.
ACADEM. GIESEN. SOCII

NOVA THEORIA
PLEURITIDIS VERAЕ

ET

RECTA EIDEM MEDENDI RATIO


EXPERIMENTIS DEMONSTRATA.



MOGUNTIAE,

Ex Typogr. Elect. Aul. Acad. privil. apud Joannem Josephum Alef,
Hered. Haeffner.

1786.



Ille affideat necesse est, qui, quod solum
opus est, visurus est.

A. C. CELSUS de Medicina
Lib. III. Cap. 4.



REGIAE
SOCIETATIS MEDICAE
PARISIENSI

CAROLUS STRACK

FELICITATEM.


Quo sunt, Viri illustrissimi, propter quæ novam istam Pleuritidis veræ theoriam nomini vestro subscribam: alterum, ut meæ in Vos estimationis atque grati animi ratio palam apud omnes constet; qui me proxime ab utilis Instituti regii ortu laudabili vestro Sociorum albo inscrip-
sistis: * utpote quæ prærogativa mihi & pergrata simul & perhonorifica est: alterum, quomagis & ista quoque mea opera, utique sub vestris auspi-

* Anno 1776. mense Novembri.

*ciis tuta, careat obtréditationis invidia; cujus vix
exsortia nova quæque inventa sunt; maximeque
si ea longe a vulgarium dictatorum sententia se-
cedant, atque procul a tritis Scholarum pulpitis
distent.*

*Ita ego, omnis curæ expers, propositum, quod
fidenter exorsus sum, liberali animo persequar.
Valete.*

PRAE-



PRÆFATIO.

Novam veræ Pleuritidis theoriam atque rectam eidem medendi rationem docurus non dubito fore plerosque medicos, qui istud scripturæ genus ut vanum & super-
vacuum repudiabunt; cum sibi persuadeant, vix posse aliquid aut perfectius aut eruditius de Pleuritide sive dici sive scribi; quam quod ab antiquissimis olim medicis per plurimos imposterum doctos viros ad nostra usque tempora continuo relatum accepimus. At si nunc dicam, quod iste quidem vulgaris morbus etiam ab artis ortu retro per tot annorum secula ad postremos hucusque medicinæ professores neque omnino cognitus neque recte curatus fuerit, utique audax multis, imo temerarius nonnullis videbor.

Equidem non ignoro, quam difficulter homines eam sententiam exuant, quam intra tyrocinium acceperunt, & deinde per longam ætatem fidenter retinuerunt: maximeque si eadem aliorum excellentium Virorum opinio-

ni consentire ipsis videatur. Nihilominus spero, fore ut ego & istos quoque imitatores a trito tali tramide flectam, eosdemque ad Verum deducam: brevi & efficaci per exempla via.

Et ante omnia nosse refert; morborum multos alienam omninoque a suo genio diversam formam recipere, prout iidem alia atque diversa curandi ratione agitantur; quam larvam utique non admisissent, nisi vi adversæ medicinæ ad talem excessum pulsi fuissent. Quodsi deinde per talem violentiam coacta natura trans novam etsi inconvenientem aliquam viam ipsa victrix erumpat, protinus hunc exitum tanquam criticum & quasi ipsi morbo proprium præcipites medici (quorum opinione plus est) intuentur, eundemque imposterum tanquam certum & exploratum medicina perficiendum esse contendunt. Contra alii privatam suam quoque medendi rationem tanquam certam & usu probatam sustinent: & sic porro aliter alii statuunt. Similiter opinione falluntur hi, qui movendo sputa Pleuritidi medendum esse putant. Sputa enim ipsa non Pleuritidis, sed alterius cujuspiam morbi, qui a Pleuritide remansit, crisis sunt.

Non

Non fecus idem ego olim juvenis medicus in his artis magistros secutus sum &, quæ ex probatorum virorum libris collegi, imitatus pleuriticos, quos acceperam, simli, qua illi curatione habebam; quæ modo mihi ut illis successit, modo iterum me quemadmodum ipsos perinde defecit. Quare, non tenax opinionum, jure dubitavi; verane an falsa ista theoria sit, quam nihilominus scholæ ut certam retinuerunt. Dubitationem perfecit occasio, quæ anno 1751, quo Pleuritis popularis erat, ostendit se, mihique ad pervestigandum & tempus concessit, & multos tales ægros obtulit. Ita veram Pleuritidis causam simul & rectam eidem medendi rationem perdidici. Proximo deinde anno 1752 reversus idem morbus est, multosque item hominesprehendit. Interea ego peropportuna ista occasione iterum usus sum; cum ut ea ita perficiam, quæ ante didiceram; tum ut hæc confirmem, quæ in istius morbi curationibus hucusque expertus eram. Tali cautione atque in observando attentione didici, morbus quo die finem accipere, qualem is exitum sumere, aut quam aliam corporis partem prehendere consuescat?

Quæ Pleuritidi propria crisis, quæ ab eadem aliena sit? Quis malus morbi exitus metuentus sit; isque quomodo caveri queat? Hæc cum satis cognita atque perspecta mihi fuissent, naturam in his medendo imitatus sum. Quæ curatio impofterum per longos hucusque annos successit.

Itaque, qui ante sani homines in Pleuritidem veram inciderunt, hi omnes sine noxa septimo ut plurimum die, nonnunquam etiam nono ad summum undecimo, perfecte sani ex ea revenerunt. Imo hos, quos post sanguinis sputum phthisis male habebat, & qui per multos annos pus sputo ejecerunt, siquidem Pleuritide tentati sunt, nihilominus similiter restitui: adeo ut neque post Pleuritidem pejor phthisis evenerit quam ipsa ante fuerat; sed ut hæc talis, qualis hucusque fuerat, impofterum manserit. Unicus tantum marasmi status est, intra quem Pleuritis curationem non admittit: isque perraro obtinet. Etsi autem Pleuritis sub nostro quidem coelo satis frequens & nonnunquam popularis sit, tamen inter omnes, qui ab anno 1751 hucusque ob-
venerunt, ægros, nonnisi quinque perierunt:

de

de quibus non inutilem mentionem suo loco facturus sum.


Neque ego sputi faticinia, quæ latam scriptorum paginam implent, sive adversa metuo sive secunda expecto; nimirum quoniam istum morbum absque sputi ejectione certe submoveo.

Ad hæc, ut ea demonstrem, utar his, quæ Experientia in ipsis istius morbi curationibus sæpe sæpius docuit me; exempla, quæ lectoris animum trahere ad Verum possint, propositurum.

Non autem unius tempestatis aut ejusdem constitutionis ista exempla sunt, sed multorum successive annorum, intra quos Pleuritis cum epidemica tum sparradica fuerat. Etiam diversæ ætatis ægros in medium proferam, qui Pleuritide affecti fuere. Item ægros notavi, quos, cum morbus infedit, sero accepi. Denique diuturnos aliquos morbos, cum quibus Pleuritis complicata erat, adducam. Atque ex istis iterum exemplis tot & talia excerpfi, quot & qualia ad demonstrationem Veri sufficere mihi videbantur. Cætera, ne absque utilitate longus sim, rescindo.

Postre-

Postremo dies indicabo, intra quos Pleuritis judicari consuevit; imparibus nempe perfecte, paribus contra imperfecte. Quæ demonstratio, quoniam ea Hippocratis asserto consentanea est, utique arduam illam de imparibus atque de paribus diebus criticis disputationem vacuabit. Ista ideo ita propono, cum ut veritas magis elucescat, tum quoniam existimo, quod hæc nosse hominum salutis intersit.



INDEX CAPITUM,

CAPUT I.

Vanum est, quod Authores de causa Pleuritidis dicunt - - - pag. I

CAPUT II.

De exitu, quem Pleuritis in sanitatem per se sumit - - - - - 7

CAPUT III.

Quomodo Pleuritis fiat? - - - 14

CAPUT IV.

De usitata Pleuritidis curatione - - - 22

CAPUT V.

De mea Pleuritidi medendi ratione - - 46

CAPUT VI.

De Crisi, quæ intra Convalescentiam fit 83


CAPUT

CAPUT VII.

Febris pleuritica cujus generis? - - - 97

CAPUT VIII.

De diebus criticis - - - 108



NOVA THEORIA PLEURITIDIS VERAЕ; ET RECTA EIDEM MEDENDI RATIO.

C A P U T I.

*Vanum est, quod Authores de causa
Pleuritidis dicunt.*

Vulgaris & satis trita Authorum sententia est; Pleuritidem vera moriri, posteaquam calore æstuans corpus adversus ventus afflavit: a) Ita fieri in latere inflammationem; quam dolor, febris, tusis &c. sequuntur.

Verum sic non satis explicant; quomodo hi, qui neque corpus motu calefecerunt, neque ipsi per fervidam tempestatem incaluerunt, neque frigore perculsi sunt, nihilominus in sua camera, in ipso suo lecto Pleuritide vera correpti fuerint?

Puer-

a) „Eorum initium vel ex frigore vel ex ictu, vel
„ ex nimio cursu, vel ex morbo est. „ A. C. Celsus
Lib. IV. Cap. 6. de laterum doloribus.



AEGROTUS I. Puerpera bene sana, quarto decimo post partum die, recte fluentibus cum lochiis, in suo lecto Pleuritide vera, quae ea tempestate


AEGROTUS II. popularis erat, affecta est. Monialis virgo 53 annorum catarrho laborabat; & mediam intra sputi costi expectorationem, in suo lecto, in calefacta sua camera Pleuritide, quae epidemica erat, correpta est; & tunc ipse

AEGROTUS III. sanguis crustam densam albam habuit. Mulier posteaquam hæmorrhagia uteri, quam quatuordecim menses traxerat, & hydropse liberata fuit, Pleuritide, quæ ea tempestate popularis erat, in ipsa sua camera prehensa

AEGROTUS IV. est. Strenuus vini potator vehementer hydropicus factus est. Is cum dimidiam hydropis partem lotio emisisset, & ne minimum quidem in diætæ præcepta peccasset, nihilominus suo in lecto Pleuritide, quæ tunc temporis epidemica erat, tentatus est. Hujus sanguis perdensa crusta obductus erat.

AEGROTUS V. Virgo 63 annorum ob inveteratam arthritidem membrorum motu orba quinque annos lecto affixa erat; hæc nihilominus medio in suo lecto, in ipsa calefacta sua camera, cujus porta fenestræque scrupulosius conclusæ manebant, Pleuritide vera affecta est.

Neque poterunt isti Authores Pleuritidis epidemicæ rationem reddere; minimeque



que cur eadem Vere potissimum atque Autumno grassari consuecat? Scilicet qua tempestate febres intermittentes populares sunt. Neque sciunt, cur acidum eructantes pleuritici non fiant. *b)* Nesciunt item cur hi, qui Pleuritide vera laborare consuecunt, vix unquam febre intermittente corripiantur? Auriga per longum annorum intervallum ter AEGROTUS VI. Pleuritide vera laborabat, nunquam vero febre intermittente; etsi ea interea sæpe popularis fuisset. Monialis virgo, de qua paulo ante *c)* dixi, intra triginta hucusque annos vera Pleuritide ter affecta fuit, nunquam vero febre intermittente; etsi ista febris magis in suo quam in alio quopiam monasterio familiaris esse consuecat. Et sic porro alii. Neque sciunt, quomodo febris intermittens in Pleuritidem veram transeat, & quomodo Pleuritidem febris intermittens sequatur? Neque recte respondere poterunt, ob quam causam dolor, si is ex affecto latere in humerum ascendit, bono augurio sit?

A 2 Alii

b) „ Acidum ructum habentes non ita valde pleuritici
„ fiunt. „ Hipp. Aph. 33. Sect. VI.

c) Aegrotus. II.




Alii non a sanguinis inflammatione, sed ab ipsius feri sive partis mucosæ incendio Pleuritidem esse volunt; & ad eam dirigi curationem debere sustinent. Hos secuti fere omnes hodie Medici sunt. Verum etiam hi (præterquam quod ad ea, quæ supra posui, item respondere non possunt, eademque ipsis etiam incomprehensibilia atque explicatu impossibilia manent,) similiter ac illi a recto aberrant; qui Pleuritidem ob inflammatum cruorem esse contendunt.

Et primo quidem crusta illa sanguinis lardacea non Pleuritidi propria, sed omnibus inflammatoriis morbis in universum communis est; veluti febri ardenti, phlegmoni, anginæ, variolis quæ infederunt &c. imo ipsi etiam febri intermittenti, ubi ea inveteravit.

Deinde rationem reddere nequeunt propter quam ista crusta tormentum in latere efficiat; cum tamen ea nullum fixum dolorem in quacunque alia corporis parte intra qualemcunque alium inflammatorium morbum excitet, imo excitare ne in latere quidem ipso possit?

Postremo, nequiquam verum est, quod docent. Pleuritis enim non ob inflammatum Serum est; sed contra, Serum ipsum
ob



ob Pleuritidem, quæ est, inflammatur, crustamque accipit: imo eadem ipsa crusta indies eo magis magisque densa tenaxque fit, quo diutius Pleuritis insidet. Id per hæc maxime patet: & quoniam sanguis, qui protinus e pleuriticorum vena mittitur, crustæ nihil habere consuecit; & alter, qui postero die demitur, crustæ aliquantum habet; & qui tertio die extrahitur crustæ plus, & sic porro plurimum ejusdem, si nullus adhibuit remedium effectus sequatur; aut si natura ipsa non ocius juvet. Hic aliqua, ne justo longior sim, præ plurimis cæteris exempla ponam.

Anno 1779 mense Majo Cultrorum faber Pleuritide affectus est; ejusdemque sanguis, qui per primam venæsectionem ipso quinto morbi die (siquidem hucusque æger absque remedio erat) extractus est, crustæ expers omninoque sanguini sani hominis similis erat. Post alteram vero venæsectionem sexto die sanguis crustam habuit, ÆGROTUS VII.

Juvenis faber ferrarius mense Majo anni 1779, qua tempestate Pleuritis popularis erat, eodem morbo prehensus est. Hujus sanguis, qui primo die e vena extractus est, absque crusta & sanorum sanguini simillimus erat: ÆGROTUS VIII.



altero die mane discum unum misit, qui crustæ quidquam habebat; vesperi item discum unum, qui crustæ plus habebat; & sic porro quotidie: sanguinis enim discus, quem sexto die misit, perdensam lardaceam crustam habuit: ille denique sanguis, qui medio septimo die extractus est, densissimam, crassissimam durissimamque crustam, corii instar, habuit.

Ex quibus item patet, crustam ob Pleuritidem esse; non vero Pleuritidem ob crustam: Serum a morbo in crustam cogi, non autem ob crustam morbum esse.

Est quoque ipsas inter crustas quædam ratio atque diversitas. Etenim, qui sani plus Seri idemque spissius habent, hi, si Pleuritide corripiuntur, crustam & ocius & eandem tenaciorem accipiunt; quam qui tenuius Serum habent: item, quo intentior febris æstus est, eo & crustæ plus est; eademque tenacior. Deinde quo diutius Pleuritis infidet, eo crassior duriorque crusta per morbum fit. Crustarum pessima subflava est; quæ granula, veluti vetus mel, habet.

Atque talia ante nosse refert: cùm quoniam ea ad morbum pertinent; tum quoniam ipsa ad curandi rationem conferunt.

Minutiæ




Minutiæ autem illæ Sydenhamii quæstiones atque peruestigationes, ob quam causam primus sanguinis discus crustam habuerit, alter non, tertius item crustam? qualis sanguis evenerit, qui horizontaliter exfliit; qualis qui perpendiculariter defluxit &c., vanæ, supervacuæ, atque nullius frugi sunt; adeo, ut non parum mirer, quod etiam celebres medicinæ professores imposterum istis minutiis curiosius adhæserint; a quibus tamen nullum hucusque sive æger sive medicus profectum habuit.

CAPUT II.

De exitu, quem Pleuritis in sanitatem per se sumit.

Nihil magis ad perfectam morborum cognitionem atque ad curandi rationem confert, quam crisiū observatio; non tantum earum, quæ intra morbum ipsum fiunt; sed & harum, quæ per convalescentiam contingunt. Verum postremas istas crises soli medici philosophi prosequuntur, mercenarii non attingunt.


Ne vero in ista naturæ contemplatione fallamur, tutum erit, ut morbum ipsum vel naturæ relinquamus, vel talia auxilia adhibeamus, qualia neque vehementer moveant,



neque morbi figuram geniumque alterare possint: nempe, ut ita cognoscamus, quæ artis auxilio, quæ naturæ beneficio contigerint; neve naturæ tribuamus, quod medicinæ debemus. His præmissis ad Pleuritidis Crises progredior.

Itaque, quod ante omnia nosse interest, duplex Pleuritidis, ut multarum aliarum febrrium continentium, crisis est: altera Febris; altera Materiæ, quam febris confecit atque reliquit. Illa prior est, & citius contingit; hæc posterior, & sæpe intra convalescentiam expletur. Id est: Febris suam sibi que propriam statutisque suis diebus crisin habet: crusta privatam suam imposterum: hæcque item varia est; tam quoad tempus, intra quod ea contingit; quam quoad corporis partem, per quam eadem erumpit. Res per Exempla patebit.

Nempe medicis practicis notum atque expertum est; quod Pleuritis sæpe tertio die, nonnunquam etiam septimo, sine sputi excreatione finem accipiat; vel quinto nempe posteaquam a medio vel tertio vel quinto vel septimo die ad ejus finem usque plurimus sudor calidus viscidusque, qui acidum odorem habet, erupit. Cum isto sudore urina rubra
crassa




crassa emittitur; quæ, cum frigesit, sedimentum lateri trito simile præcipitat: perinde ac in multis aliis febribus, quæ absque lateris dolore sunt, contingere consuevit.

Anno 1766 die 26 Decembris juvenis ÆGROTUS
IX.
torosus Pleuritide vera correptus est. Hujus venam protinus, deinde iterum, post rursus incidere jussi. Extractus initio sanguis crustam crassam albam habuit, alter crustæ minus, tertius minimum. Affecto lateri fomenta imposui: Medicinæ julapium cum nitro & oxymelle dedi; Potui vero molles herbas ex aqua coctas; cibo autem sorditiones.

Tertio die sudor multus acidus ex universa corporis cute erupit; urina sedimentum crassum lateri trito simile deposuit; ægerque omnis doloris expers sine sputo convaluit, & lectum quarto die deseruit.

Anno 1767 die 19 Februarii servum ÆGROTUS
X.
Pleuritis præhendit. Hujus venam protinus secari jussi; missusque sanguis crustam habuit. Julapium refrigerans decoctumque præcepi adjecto nitro & oxymelle: victum item tenuem.

Altero die, propterea quod dolor præsit, secunda iterum vena est; extractusque ex



ea sanguis crustam non omnino sed ex parte habuit.


Finito tertio die morbus resolutus est, ægerque absque spuito proxime convaluit.

AEGROTUS
XI.

Anno 1778 die 7 Septembris adolescentem fortem 15 annorum Pleuritisprehendit. Hunc cum altero die accepissem, protinus ex ejus vena duos sanguinis discos misi, qui aliquantum crustæ habebat. Vesperi enema imperavi. Cibo dedi cremorem hordei adjecto citrei succo: Potui vero radices graminis, acetosæ, scorzonæræ, liquiritiæ, cum floribus papaveris erratici & nitro ex aqua coctas, adjecto aceto vini destillato & rubi idæi Syrupo. Julapium item ex aquæ fragorum unciis sex, nitri drachma, aceti destillati semuncia, Syrupi rubi idæi uncia.

Medio in tertio die sanguinis unum discum extraxi. Tussis parum crudi emolita est.

A fine tertii diei per quartum quintumque urina turbida erat cum sedimento lateri trito simili. Quinto die multus sudor acidus ex universa corporis cute erupit cum levamine, similisque per sextum in septimum continuavit. Verum a medio die septimo ad
ejus



ejus exitum usque quàmplurimus talis sudor erupit; ægrumque absque sputo omnino restituit, qui octavo die lectum dimisit.


Anno 1774 ad exitum mensis Octobris, AEGROTUS
XII.
qua tempestate febris intermittens epidemica non erat, mulier crassa, 56 annos nata, Pleuritide vera affecta est. Ad finem secundi diei in auxilium vocatus pulsus parvus atque contractus inveni, ideoque sanguinis discum unum misi: is crustam non habuit. Julapium cum nitro & oxymelle simplici atque decoctum refrigerans imperavi.

Initio tertii diei Vesicatorium latum in affecto loco positum est. Post duodecim horas urina nubeculam valde mucosam habuit, utique a cantharidibus: pulsus plenus erat.

A medio die quinto multus sudor acidus erupit; sine vero ejusdem diei urina crassa, turbida, evenit cum sedimento lateri trito simili. Per sextum diem sudoris non multum. At septimo die largus item sudor, & similis quoque urina turbida; quæ morbo finem fecerunt absque sputo.

Prædixi, quod octavo die urina clara cum nubecula sanorum urinæ similis futura sit. Quæ ita contigit.

Anno



AEGROTUS
XIII.

Anno 1774 die 15 Decembris juvenis faber ferrarius Pleuritide affectus est. Eum altero die vidi; ex ejusdemque vena sanguinis discum unum misi, non plus; ob id, quod arteriarum pulsus contractus erat. Sanguis crustam habuit. Vesperis sanguinis item discum misi; qui similiter crustam habuit. Veficatorium imperavi, julapium cum oxymelle, decoctum refrigerans adjecto oxymelle.

Tertio die pulsus aliquantum mollis plenusque erat; ideoque sanguinem non ultra misi. Quarto cruda sputa æger emolitus est.

A medio die quinto in sexti initium multus sudor acidus erupit; urina turbida evenit cum multo sedimento lateri trito simili: inde restituta spirandi libertas, deletaque omnis tussis est. Sexto die facilis sudor erat. A medio septimi diei ad ejus finem usque plurimus item sudor acidus erupit, iterumque facta turbida urina est cum sedimento lateri trito simili; protinusque secuta bona valetudo est.

Celebris quoque & notatu maxime digna Pleuriticæ febris Crisis labiorum exulceratio est; quæ morbum similiter protinus extinguit.

AEGROTUS
XIV.

Anno 1769 die 10 Januarii ferva vesperi per horam inhorruit, deinde vehementer
in-

incaluit simul & acutum in dextro latere dolorem quartam inter & quintam costam accepit, cum spirandi difficultate, cum arida tussi, & cum celeri arteriarum pulsu.

Ejus vena secta est; missusque ex ea iterumque missus sanguis lardaceam crustam habuit. Postero die calor remisit, & largus sudor erupit, & oris labia ulcerari ceperunt. Tertio die similis calor, similis item sudor post; & cum sic penitus exulcerata labia fuissent, ipsa etiam febris & lateris dolor ad finem ejusdem diei desierunt.

Anno 1779 die 4 Februarii serva primo AEGROTUS
XV. friguit, deinde incaluit, acutumque in dextro latere dolorem accepit cum tussi & spirandi difficultate. Venam brachii ejusdem lateris secari jussi, jus tenue præstiti; & aquam Potui dedi. Postero die exulcerata oris labia sunt; indeque omnis lateris dolor evanuit.

Anno 1777 die 8 Januarii Pleuritide correptus est coquus. AEGROTUS
XVI. Protinus secta ejus vena est, ex eademque missi sunt sanguinis disci tres; quorum unus crustæ quidquam habebat. Bibit æger decoctum refrigerans adjecto aceto vini destillato & Syrupo rubi idæi. Julapium quot horis sumsit ammisto nitro & oxymelle simplici; cui altero die roob Sambuci drachmas duas adjeci.



A medio ad exitum tertii diei æger plurimum exsudavit. Exulcerata ejus oris labia sunt; ipsaque urina facta turbida est, atque sedimentum lateri trito simile deposuit; ipseque lateris dolor deletus est, ægrumque protinus sanum reliquit.

ÆGROTUS
XVII.

Anno 1769 die 20 Januarii Virgo 50 annos nata Pleuritide vera tentabatur: ob quam secta ipsi vena est. Post, morosa noluit neque oblata quæpiam auxilia accipere; sed contra suo indulgit genio.

Hujus oris labia ulcerari ceperunt; inque his ut confectum pus est, febris ipsa ægram dimisit, & ipse lateris dolor deletus est. Convaleuit autem die decimo absque sputo.

Sunt adhuc alii quidam Pleuritidis exitus quidem rari; de quibus paulo magis infra dicam.

C A P U T III.

Quomodo Pleuritis fiat?

Atque tales quidem pleuriticæ febris consueti exitus sunt; qui omnem & febrim cito extinguunt, & tussim delent, & lateris dolorem eximunt.


Facilis



Facilis autem ista febris est, utpote quæ corpori non diu inhæret; sed idem quamproxime, ut aliæ quædam exiguæ febres, tertio, quinto, septimove die per sudorem perque turbidam urinam dimittit. Excitatam vero esse eandem a singulari quapiam materia atque privato quodam miasmate per hæc potissimum cognoscimus: cum quoniam ea citius e latere egressa tanquam adhuc cruda per labia exulceratur: tum quoniam ipsa sæpe & utplurimum epidemica est; Vere nempe atque Autumno. Epidemici enim morbi, qui non a mutata per tempestatem corporis constitutione sunt, sed unicam tantum corporis partemprehendunt, quod excitati a privato quopiam miasmate sint, censentur. Neque obstat, quod intra cætera anni tempora hinc & inde aliquis unusve Pleuritide corripiatur. Potest enim Pleuritis, ut alii quidam epidemici morbi, sporadica remansisse.

Imo non absurdum est credere, istam pleuriticæ febris materiam contagiosam esse, scilicet per quam æger sanum quenquem inficere possit. Anno 1774 ad exitum Februarii mensis auriga ab itinere redux Pleuritide tentatus est. Isti in eodem lecto sua uxor per quinque noctes acubuit, neque eadem
hoc

AEGROTUS
XVIII.



hoc tempore five domo egressa est, five vento, five tempestate exposita fuit; nihilominus ipsa die 28 Februarii similiter Pleuritide affecta est. Aegrum istum aurigam amicus alter auriga invisit; idemque pariter Pleuritide correptus est.

Fit autem Pleuritis maxime sic. Quoties pleuriticæ febris materia (quæ, cujus generis sit, paulo magis infra patebit) in latus se inclinât; in eodemque suum inflammationis focum figit; magnus ibidem & peracutus excitatur dolor; qui spiritum difficilem atque angustum reddit, tussimque asperam vanamque efficit. Arteriarum pulsus ob dolorem contractus convulsusque est; parvus vero atque frequens ob respirationis angustiam.

Magis autem intenta ideo ista febris est; quoniam ejus materia fixa in sensibili membrana est. Prout enim ita affecta aliqua corporis pars five magis five minus sensibilis est; pro eo etiam ex ea & dolor & febris modo magis modo minus intentitur. Ita, si pinguitudini ista materia inhæret, ipsa iners est: si in carnibus est, levem eâ dolorem exigamque febrim excitat: in cute majorem: in membranis, quæ tendines atque ossa tegunt,
maxi-

maximum dolorem & febrim intensissimam. Id notum omnibus medicis est: exemplo sint diversæ panaritii species. Quodsi porro eadem materia .latus dimittit, & per labia erumpit, minor item in labiis dolor erit, quam qui in latere fuerat, etiam minor febris aut nulla fere. Quodsi ista materia e latere ad humerum ascendat (quod utique medici practici pro fausto omine habent) vix dolor & febris supereff.

Contra; si eadem materia, quæ ante exiguo cum dolore in humero residebat, postea in latus descendit; ea ibidem & vehementem dolorem & peracutam febrim excitat.

Anno 1774 mense Februario juvenis sana- ÆGROTUS
XIX.
que virgo, quæ neque arthritide neque rheumatismo unquam laboraverat, dolorem in humerò accepit; qui exiguo cum frigore incepit, quod secutus exiguus calor est, exiguaque febris. Altero die dolor humerum dimisit atque in latus descendit, ibidemque conveniens in uno puncto fixit se. Inde ortus vehemens ibidem dolor intentaque febris, pessimaque facta Pleuritis vera est, cum omnibus cæteris symptomatibus, quæ propria pleuritidi sunt.




AEGROTUS
XX.

Anno 1781 die 2 Martii juveni dolor in sinistra axilla ortus absque febre est. Post aliquot horas dolor in latus descendit, & veram ibi Pleuritidem excitavit, cum peracuta febre. Missus e vena primus sanguis crustæ expers erat; qui vero postea missus est, densa crusta tectus erat. Judicatus est æger die septimo.

Nonnunquam etiam ista materia non proutinus in latus decumbit; sed veluti vaga aliquot dies pectus ante pererrat, premit, atque vexat, quam in latere figit se atque ita Pleuritidem perficit. Quandoque inde spasmus tantum, non dolor est, pectoris partes qua- tiens; tuncque non multum caloris adest; ipseque sanguis, qui mittitur, parum crustæ habet. Ita signifer imperatoris legionis habebat. Is cum moschum atque camphoram assumisset, intra 24 horas convaluit. Simi- liter Nutrix, quæ Pleuritidi obnoxia erat, diu ante traxit, quam Pleuritis confirmavit se. Nonnunquam idem dolor ad latus, quod dimisit, revertitur. Is sexto die reversus est & paulo altius fixit se in latere juvenis fabri ferrarii, de quo supra dixi.* Ita idem
quarto

AEGROTUS
XXI.

AEGROTUS
XXII.



quarto die sinistrum latus servi dimisit, & octavo die dextrum latus reprehendit. *

Anno 1779 initio mensis Decembris, ^{AEGROTUS} tempestate supra consuetudinem tepida & ^{XXIII.} pluviosa mercator 44 annos natus, & qui neque arthritide neque rheumatismo ante affectus erat, per itum atque reditum modo insudavit, modo iterum in subterraneas caveas descendit; deinde navi commisit se, adverso flumine moguntiam iturus. Is in via friguit, & collum rigidum accepit. Supervenit dolor, qui nucham, deinde humeros, scapulas post, serpendoprehendit, sicque spirandi facultatem turbavit. Nihilominus arteriarum pulsus plenus & mollis erat, febris necquicquam.


Undécimo die dolor supernas corporis partes dimisit, & in latus dextrum descendit; ex eodemque & arteriarum pulsus parvum reddidit, & difficilem respirationem effecit.

Missus e vena sanguis est, qui tenuem crustam habuit; applicatum affecto lateri emplastrum vesicatorium est.

B 2

Tertio

* Aegrotus LXXII.



Tertio Pleuritidis die sudor acidus erupit; & urina sedimentum lateri trito simile præcipitavit; ipseque dolor latus dimisit & iterum ad humerum ascendit.

Quinto die similis sudor erupit simileque sedimentum urina præcipitavit, sicque ægrum integræ sanitati restituit.


ÆGROTUS
XXIV.

Anno 1783 mense Decembri nobiles puellæ altera octo, altera decem annorum, dolorem acutum in una axilla acceperunt; qui in scapulam transiit, ex scapula in nucham ascendit, exque ea in latus decubuit, ibidemque Pleuritidem veram excitavit. Secta vena est; sanguis crustam habuit. Sanatæ sunt per easdem crises, quæ imparibus diebus contigerunt.

ÆGROTUS
XXV.

Anno 1784 die 23 Novembris virgo viginti annos nata, quæ nullo unquam dolore rheumatico laborabat, frigore correpta est, quod secutus magnus calor est. Altero die intumuit gena sinistra, ipsaque facta rubra & ardens est; quasi ibidem locorum abscessus juxta gingivas futurus sit. Gingivæ autem ipsæ necquicquam tumidæ fuerunt.

Ob febrim secta vena est; sanguis crustam habuit. Tertio die dolor & ardor genam dimiserunt, vitiumque in latus sinistrum descendit;



cendit; inque eo Pleuritidem veram excitavit. Nunc sanguis, qui iterum e vena missus est, densiorem, quam ante, crustam habuit; qui tertia vice missus est, densissimam. Judicata est quinto & septimo die.

Atque ita quidem dolor ex humero in latus sæpius descendit, quam id quidem medici noscunt; qui morbi nomen nosse contenti non ultra quærunt: sed vellem, ut ipsi imposterum in istam quoque causæ originem curiosius inquirant.

De crusta autem sanguinis inflammatoria hæc dico. Per vehementem febris æstum serum (quæ mucosa sive glutinosa sanguinis pars est) aduritur, cogitur, atque in tenax corium compingitur: hæc crusta modo densa, modo coriacea, modo item levis, uti tenuis pellis est. Prout enim febris vel plus vel minus exardet, prout morbus vel incipit vel insedit, prout item sanus homo ipse vel plus vel minus feri, idemque vel magis vel minus tenax ante habebat, diversum crustæ corium est. Crustarum pessima flava aut subviridis est, quæ granula, qualia vetus mel, habet: talis enim & totum ferme sanguinem complectitur, & difficillime sive resolvitur, sive coquitur.



Quisquis igitur nosset istius febris titi-
nem aut eximere aut extinguere, is Pleuri-
tidi cito, tuto, & absque sputo mederi pos-
set. Hoc an vulgaris medicorum dexteritas
exequi queat, nunc peruestigatum ibo.

CAPUT IV.

De usitata Pleuritidis curatione.

Atque hæc de Pleuritidis causa experta
sunt. Sequitur vulgaris curatio, qua medici
uti consuecunt.


Et primo quidem cum vidissent, quod
sanguis. quem ægri miserant, crustam larda-
ceam habuerit; & quod hi, qui sputa crassa,
pinguia, rotunda, & puri similia ejecerunt,
a morbo evenerint; insuper quod post Hip-
pocratem celeberrimi Medicinæ Professores
fere omnes in isto præcipue morbo magnam
semper sputi rationem habuerint, utique om-
nem operam impenderunt, per quam similia
sputa moverent. Ob quam rationem sangui-
nem sæpe mittunt, ut aliquam crustæ portio-
nem demant, & talia medicamenta offerunt,
quæ crustam solvere solutamque movendo
tussim extundere queant: julapia nempe cum
nitro & oxymelle squillitico, Kermes mine-
rale, decoctum attenuans, & latum emplaf-
trum



trum vesicatorium loco, in quo dolor pungit, affixum. — Apage oleosos linctus, quibus Medicorum aliqui utuntur!

Verum hi, quoniam curationem ad crustam dirigunt, quam febris debent, opinione vehementer decipiuntur. Pleuritis enim non ob crustam est; sed contra crusta ipsa, ut supra per experimenta indicavi, a Pleuritide fit. Ita cum effectum pro causa habeant, mirum non est, quod eosdem curatio sæpe fallat. Veluti cum fabuli granum illapsum in oculum est, oculus dolet, rubet, palpebræ convulsiva vi clauduntur, exprimuntur plurimæ lacrymæ. Vanum foret curationem ad lacrymas dirigere, quam fabuli granum exigis. Extracto fabulo dolor oculi cessat, restituta est palpebras diducendi libertas, neque impofterum lacrymæ defluunt. Similiter demto e latere stimulo, dolor desinit, respiratio libera est, tussis sputumque desistunt.

Et profecto ipsi, si attendissent, etiam hoc scivissent, nullum sputum intra Pleuritidis febrim sive coqui sive expectorari; sed contra posteaquam febris ipsa inclinavit atque in calore remisit: id est, expectoratione febrim non minui, sed minuta febre sputum expectorari. Experientia enim constat, mul-



tas & secretiones & excretiones asperata quacunq; febre vel turbari vel retineri: restitui vero easdem, quamprimum febris dimisit. Imo sputa rotunda, quæ five sani per consuetudinem, five ægri ob alium quendam morbum ejicere consueverant, ipsa, siquidem Pleuritis incidit, cohibentur; neque eadem ante egrediuntur, quam pleuritica febris ipsa ex toto desit.

En exempla.

ÆGROTUS
XXVI.

Anno 1762 die 13 Maji vir annos 44 natus, phlegmaticus & qui per multos hucusque annos sanus mane multa sputa rotunda liberaliter ejicere consueverat, Pleuritide vera correptus est: protinusque consueta sua sputa cohibita sunt, neque ipsa ante revere-
runt, quam post superatam febrim ad exitum morbi.

ÆGROTUS
XXVII.

Anno 1766 mense Novembri monialis virgo, de qua supra dixi, * annos 53 nata, catarrho, qui ea tempestate popularis erat, correpta est cum longa febre & difficili per quindecim dies coctione.

Deinde mediam intra sputi cocti expectorationem Pleuritis, quæ similiter popularis esse

* Aegrotus II.



esse incepit, incidit; & ægram, etsi ea neque cameram neque lectum ante deseruerat, acerbè habuit. Ob quem novum morbum anhelitus erat, tussis acerbà, atque arteriarum pulsus frequens & celer: ipsum quoque catarrhi sputum coctum, quod eousque liberaliter exiverat, nunc omne retentum est.

Secta pro doloris & virium ratione vena est, ipseque sanguis crustam tenacem lardaceam habuit: præstitum quoque julapium atque decoctum refrigerans est, & imposita lateri fomenta sunt. Judicata est multo sudore acido atque urina turbida, quæ sedimentum lateri trito simile præcipitavit.

Post, cum intra tertiam septimanam vires constitissent, multa sputa cocta, rotunda liberaliter sine adjumento per plures dies exierunt, usque dum omnia illa, quæ ob pleuriticam febrim intus retenta erant, expulsa fuerint.

Similiter phthysicorum pus, quod ægri sputo ejicere consuecunt, Pleuritide, si ea incidit, retinetur. Neque idem pus, nisi post excussam Pleuritidem imposterum, veluti ante, liberaliter expectoratur.

Anno 1776 Octobri, quo tempore Pleuritis popularis erat, vetula quæ post multum

AEGROTUS
XXVIII.



sanguinis sputum phthysica facta est, ideoque a longis hucusque annis pus sputo ejecit & mali corporis habitus erat, Pleuritide correpta est. Evenit per nostram curationem, cum quinto & septimo die insudasset, atque urinam turbidam cum sedimento lateri trito simili emisisset.

Ipsum autem puris sputum, quod ægra ante liberaliter ejicere consueverat, nunc intra ipsam Pleuritidem omne cohibitum est; neque idem ante revenit, quam Pleuritis tota submota erat. Verum tunc superata Pleuritide per convalescentiam duplo fere plus sputi exivit, quam ante incidentem istum morbum solebat: id est, primo id, quod pleuritica febris ex Phthysi retinuerat, deinde illud quod confectum ex inflammati sanguinis crusta erat: donec paulo post ad usitatam sputi antiquam portionem perventum sit. Nullam etiam noxam Pleuritis post se reliquit; sed mansit imposterum mulier neque plus neque minus phthysica.

ÆGROTUS
XXIX.

Anno 1769 pauperrimus mercenarius, qui a multis retro annis spiritum difficilem habebat, & pus sputo ejicere consueverat, incidit in Pleuritidem. Pleuritica febre cohibitum veteranum sputum est, neque idem
ante



ante, quam post superatam Pleuritidem & posteaquam vires satis constitissent, reversum est.


Ut Pleuritis, si incidit, sputum, quod est, retinet; ita eadem alias quasdam humorum excretiones, quæ secundum naturam esse debent, cohibet; neque easdem ante liberat, quam Pleuritis ipsa corpus dimisit: lac nempe nutricum & puerperarum lochia.

Anno 1774 die 28 Februarii uxor aurigæ, ^{AEGROTUS XXX.} de qua supra dixi, * Pleuritide affecta lac, quo suam hucusque prolem alebat, per morbum amisit. Inde factus pajor morbus, quemadmodum ob alteram lactis febrim, est. Reversum vero intra convalescentiam idem lac est, quo imposterum mulier prolem nutrire continuavit.

Anno 1773 die 3 Maji mulier juvenis, ^{AEGROTUS XXXI.} plethorica, & quæ a sex & dimidio mensibus utero habebat, incidit in Pleuritidem, quæ ea tempestate & juxta & circum nos popularis erat.

Ad exitum tertii diei mulier peperit præmature. Nullus partum secutus sanguis est,
secuta

* Aegrotus XVIII.




fecuta nulla lochia sunt. Superato vero morbo lochia per convalescentiam, veluti a recenti partu, efluxerunt.

Tantum igitur abest, ut sputa intra Pleuritis febrim sive coqui sive excerni possint, ut ea potius per ipsam febrim retineantur. Similiter crusta ipsa non prius, quam post febrim per corporis vires, quæ magis intra convalescentiam, quam intra morbum consistunt, coquitur; coctaque per diversos exitus excutitur: per sputum nempe, per alvum, per furunculos, per bubones. Quæ quidem coctio atque crisis, quemadmodum ea ad exitum omnium earum febrium continentium, quæ ardente calore serum adusserunt, contingit, aut in convalescentiam usque trahit; ita eadem post pleuriticam febrim obtinet. Ad hæc, ne justo longior sim, duo, quæ sequuntur, exempla sufficiant, efficacia profecto.

ÆGROTUS
XXXII.

Juvenis faber ferrarius de quo superiore capite primo dixi, * anno 1779 mense maio Pleuritide, quæ ea tempestate popularis erat, affectus est. Ex ægri vena primo die missus
vesperi

* Ægrotus. VIII.



vesperi sanguis est, sanguini sani juvenis simillimus. Missus altero die sanguis aliquantum crustæ habebat: ei vero, qui extractus vesperi est, disco, crustæ aliquantum plus inerāt. Sicque quotidie crusta, quoties missus imposterum sanguis est, & crassior simul & durior evenit. Fuit autem per decursum morbi septies secta vena.


Isti ægro præstita medicamenta sunt, & die quarto emplastrum vesicatorium latum ad affectam partem: his lateris dolor absque sputo evanuit, ægerque libere spiravit. Quinto die neque sudor erupit, neque turbida facta urina est. Ad exitum sexti diei reversus in ipsum quidem latus idem dolor est: verum is nunc magis supra fixit se. Quem ascensum Hippocrates tanquam exitiosum damnavit. d) Secta itaque vena ex eademque extractus unus sanguinis discus est; qui perdensam crustam habebat. Medio septimo die sanguinis tantundem; isque summe densam

d) „ Horrendæ quoque hæ (pleuritides) in quibus dolores superne sunt. „

Coac. prænot. Sect. II. Nro 222.

Item „ Dolores modice acuti, ad claviculam ac sursum transeuntes, perniciosi. „

Coac. prænot. Sect. I. Nro 90.




fam crustam habuit; adeo, ut omnis ista fere sanguinis portio nil, nisi crusta fuerit. Applicatum insuper inter scapulas latum emplastrum vesicatorium est.

A medio istius diei septimi ad ejus exitum, etiam cum pessimo tali sanguine, sudor multus acidus ex universo corpore erupit; cum eodemque urina turbida evenit, & sedimentum lateri trito simile deposuit: protinusque æger omnis doloris expers libere spiravit; simul & factus arteriarum pulsus lentus, mollis, æqualis & aliquantum undulans est; talisque imposterus permansit. Octavo die juvenis lectum, etsi viribus fractus, deseruit cibos desiderans.

Erat iste sudor istaque urina turbida ipsius febris crisis. Sed quo ita subito devenit pessima illa densissimaque crusta, quæ universum sanguinem adeo impleverat?

Hæc per corporis vires, cum eæ intra reconvalescentiam constitissent, cocta est. Et enim undecimo die pulsus & plenior & frequentior factus est; ex quo proxime crisin instare suspicabar: eandemque ob rem suasi, ut juvenis mane & vesperi aquæ Selteranæ tepidæ libram, adjecto saccharo sorbeat.




Die decimo tertio sputum coctum facile & liberaliter erupit, crassum, rotundum, album, non puriforme, sed quemadmodum cera alba semiliquefacta; utique tale, quale etiam post alios quosdam inflammatorios morbos intra convalescentiam emitti videmus.

Hic itaque duæ istæ diversæ crises omnino spectabiles erant: altera febris, quæ prior septimo die contigit; altera materiæ, quæ posterior die decimo tertio secuta est.

Anno 1779 die 1 Maji monachus 50 annos ÆGROTUS
XXXIII.
natus pleuritide tentatus est. Altero die missi ex incisa vena sanguinis disci duo sunt, crusta tecti: tertio die sanguinis item disci duo, densiorem crustam habentes. Applicatum affecto lateri emplastrum vesicatorium est.

Neque quinto neque septimo die vel sudor erupit, vel urina turbata est. Ideo peior morbus evenit. Die nono, propterea quod pulsus concitatus celerque erat, discum sanguinis misi, qui densissimam crustam habuit. Rursum vesperi sanguinis uncias circiter quatuor: isque totus in crustam compactus erat.


Ad exitum undecimi diei multus sudor acidus ex universa corporis cute erupit, &
urina



urina turbida evenit cum sedimento lateri trito simili. Inde arteriarum pulsus factus laudabilis est, & spiritus liber. Superato morbo sputum coctum puriforme ejectum est; ægerque prospere hucusque habet.

Male igitur ægris consulunt, qui in pleuritidis curatione potissimam sputi rationem habent; sed contra, debet ad ipsam febrim dirigi curatio, ut ipsa mali causam tollat. Ob quem in medendo errorem sæpe obtinet, ut febris necquicquam in calore desistat, sed ipsam inflammata in latere plagam pure impleat, quod postremo in pectoris cavitationem prorumpit. Ad nova tunc recurritur remedia, crudelia quæ sectis inter costas carnibus puri exitum patefaciant; aut refugium ad balsamica est, quæ neque mutare pus neque idem eximere possunt. Si gangræna ægrum jugulat, nihil auxilii superest. Debet autem pleuriticorum nemo (dummodo is ante fanus fuerat) sive empyicus fieri, sive gangræna corripit; secus in curatione culpa est.

Est autem miserabile illud fragilium hominum fatum; ut, cum principem unum errorem pro Vero acceperint, idem impostorum iisdem per multos alios illudat, ipsosque in devia deducat. Talis inanis illa & nullius



nullius ad ægri salutem frugi quæstio est; sputum, siquidem morbi causa in pleura residet, per quam viam ad pulmonem perveniat?


Hoc ut alii qui pleuritidem ob inflammata[m] pleuram esse volunt, explicant, secretas ex pleura in ipsum pulmonem vias, quæ non sunt, statuere; per quas sputum illuc directe transiret. Alii non sic, sed Pleuritidem non in ipsa pleura, sed in extima pulmonis membrana, quæ a continuata pleura venit, residere sustinent. Alii utrimque & in pleura & in extima pulmonis pelle inflammationem esse contendunt, ideoque morbum Pleuropneumoniam appellare malunt. Utrumque quærere vanum est, neque quidquam ad curandi rationem, veluti proximo capite dicam, confert. Siquidem non ex alterutrius membranæ plaga, in qua fixa inflammatio est, sputum venit; sed ex ipsa universi sanguinis crusta, posteaquam cocta ea est. Etenim per omnes corporis glandulas, per quas intra bonam valetudinem mucus secerni consuescit, per easdem superata febre idem coctus ejicitur. Cum itaque pulmo & multas tales mucæ glandulas habeat, & insuper omnis sanguis per eundem transeat, mirum profecto non est, quod plurimus talis mucus coctus post Pleuritidem per easdem



pulmonis glandulas excernatur. Nihilominus etiam cæteræ hujus generis glandulæ, quemadmodum quæ in membrana pituitaria nasi, & in intestinis sunt, suam quæque portionem eliminant, quam evenientes a morbo emungunt, & alvo deponunt. Veluti exempla infra ponam. Id potissimum intra convalescentiam spectabile est; quod valetudinis stadium multi medici practici, utique propter ægrorum turbam, observando non procul ultra prosequuntur.

Postremo hi de lana caprina rixantur: siquidem, ut paulo magis infra capite quinto demonstrabitur, Pleuritis necquicquam ob inflammatam Pleuram, sed ob inflammatum Pulmonem est.

Alterum remedium, quo medici utuntur, Emplastrum vesicatorium latum est, quod affectæ parti applicant; eæ potissimum plagæ intra quam fixus dolor est: scilicet volunt, ut volatile atque satis acre cantharidum sal, quod penetravit, tenacem sanguinis crustam incidat; quo facilius ea sputo excuti possit. Intrasse autem in sanguinem quidquam ex cantharidibus per hoc nosse putant; quoniam postero die urina, etsi non semper, tamen sæpe, cum ardore atque dolore emittitur:



tur: bono etiam augurio esse existimant; si mucus eidem urinæ inhæret: iste nonnunquam spissior est, & conveniens seque ipsum contrahens indurescit, veluti caruncula esset.

Utrum vero ex incisæ ipsius crustæ ramētis iste mucus, an vero ex uretherum vesticæque smegmate proveniat, recte dubitari potest: siquidem medicamenta quæ ex cantharidibus conficta sunt, similem urinæ mucum ostendunt; etsi æger neque Pleuritide neque alio quopiam morbo laboret, intra quem sanguis talem crustam habere consuescit.


Neque etiam, etsi iste mucus ab incisæ sanguinis crusta esset, quicquam juvat; cum quoniam sic non satis crustæ divisum attenuatumque est, tum potissimum ob id quod spiritum vesicatoria sæpe non sequitur; sed posteaquam, ut supra monui, cum febris ipsa in calore desistit, idem erumpit. Exemplo item sit juvenis ille faber ferrarius, de quo paulo ante dixi; etsi enim is quarto die applicatum lateri vesicatorium habuisset, nihilominus ejus sanguis qui quinto & sexto die extractus est, plus, quam ante, crustæ habebat. Imo post alterum latum vesicatorium, quod sexto die inter scapulas positum est,




sanguis septimo die missus fere totus in omnium densissimam crustam coivit. Similiter monachi sanguis quo diutius morbus insedit, eo densiorem crustam accepit: etsi idem applicatum emplastrum vesicatorium habuisset.

Et siquidem post applicatum tale vesicatorium proxime secutum laudabile aliquod sputum est, idem non ideo evenit quoniam cantharidum sal sive crustam incidit, sive vasa ad agendum & Pulmonem ad expellendum incitavit; sed potissimum ob id, quod ita extus excitatus dolor inflammationis focus commovit eundemque a parte sensibili in minus sensibilem traxit: inde dolor & cum eo febris desierunt, ob eandemque causam reversa spirandi libertas est, sputumque paulo post: quemadmodum id supra fusius a me demonstratum est. Eadem ratione modoque, ac cum omnis inflammationis materia per oris labia erumpit, totus morbus desinit; aut ubi eadem materia ad humerum ascendit: ut supra per exempla docui.

Ob quam causam non raro obtinet, ut vesicatorii Stygma pus coctum trahat, aut juxta eam plagam furunculi vel proxime vel paulo post cum emolumento erumpant.



Recte vero medici inflammationis atque febris causa decoctum refrigerans potui dant: quod præprimis per certas herbas attenuans efficere volunt, utique quoniam crustam attenuare student: sed in eo vehementer errant atque ægros lædunt, quod eosdem ad bibendum supra modum rationemque urgent atque potu veluti inundant: quod vitium diluentibus medicis familiare & ægris noxium est. Potus enim aquæ nimius, aut citius quam convenit, ingurgitatus per sanguinem sine profectu translabitur, aut cum noxa per alvum effunditur. Vidi, quod ægri, qui tale decoctum contra præceptum iusto liberatus hauserunt, alvi fluxum aquosum acceperint: rursus vero clausam alvum habuerint, posteaquam ipsum eundem potum ad libras sex intra viginti quatuor horas coercuerunt. Potus enim, ut proficiat, debet similiter ac cibis digeri: nimius ventriculum gravat atque offendit; quemadmodum id unusquisque medicus ex pulsu, si eum novit, facile percipere poterit. Talis potandi excessus naturam turbat, eandemque a salutare sua opera, quam adversus morbum incepit, deflectit atque novo vitio onustat. Parvis itaque & sæpe repetitis haustibus potus dari debet; quo facilius idem confici possit, confectusque san-



guini penitus uniri. “ In Pleuriticis ac peripneumoniacis mala est urina, quæ post potum cito mingitur. „ e) Utique quoniam potus, qui sanguini non jungitur, juvare non potest.

Nunc ad venæ sectionem venio; quæ princeps inflammationis remedium est. Et hic iterum in disputationis limine quæritur: ad quem usque morbi diem sanguinem mittere liceat? Hos inter disceptantes plurimi venam ante quartum morbi diem incidere malunt, imposterum nolunt. Contra alii procul ultra sanguinem eximunt. Ego (uti per decursum istius libri docebo) sanguinem toties subtraho, quoties & calor exardescit, & febris urget. “ Anaxionis pleuritide laborantis vena die octavo secta in cubito est. „ f)

Deinde altera item inter medicos controversa est; utrum ex brachio affecti lateris sanguinem ducere conveniat; an ex adverso trahere eundem præstet? In qua quidem opinionum diversitate utrique adeo tenaces suæ


e) Hippocrates libro de coacis prænot. Nro 3—5.

f) Hippocrates de morb. popul. lib. III. sect. II. ægrotus 8.

suæ sententiæ sunt; ut, cum aliquem horum sua curatio fefellit, idem protinus culpam in venæ sectionem conjecerit, propterea quod ea in altero brachio contra suam existimationem instituta fuit. Contra vero alii diversi ab illis sanguinem ex alterutro brachio perinde trahunt.


Ego sanguinem non absque ratione e venâ sic eximo: nempe primas venæ sectiones in brachio ejusdem lateris, in quo fixus dolor est, instituo; posteras prout venæ locus superest in alterutro. Ex affecti lateris vena sanguinem mitto ob rationes, quas experientia me docuit; & quæ unicuique medico practico patebunt, si is attentum ad eas animum habere velit. Hæ tales sunt.

Qui magnum hepatis lobum inflammatum habet, hujus gena dextra plus rubet & ardet, quam sinistra. Contra, si quis magnam in aliquo sinistri corporis viscere inflammationem habet; ejus gena sinistra plus rubet & ardet, quam dextra. Id sæpe obtinet. Nonnunquam gena sani lateris necquicquam rubet, sed altera secundum læsum latus. Similiter vidi, quod gena rubra & ardens juxta idem latus fuerit, in quo inflammatus unus pulmonis lobus erat: contra in altera




gena g). Est igitur certus aliquis inter ipsas ejusdem lateris partes consensus. Homines vidi; qui omnia sua vitia, quæ iisdem a longis eousque annis acciderunt, in una eademque dimidia corporis parte a capite ad calcem usque habebant; nullum in adversa parte. Vir phthysicus erat, & sputo pus ejecit; in sinistro latere cubare potuit, in dextro non. Erat ulcus in sinistro pulmone. Magnum tumorem inkistatum juxta costas ejusdem lateris secundum vertebrae habuit; tumorem item inkistatum ad digitum sinistrae manus, qui apertus curationem non admisit; similem tumorem in sinistro femore; talem item in sinistro crure. Istius generis exempla attentos practicos non latebunt. Nunc ad Pleuritidem revertor. Sæpe vidi; ardente calore genam ejusdem lateris, in quo dolor pleuriticus pressit, potissimum rubram calidamque

-
- g) „ Peripneumoniciis quibus tota lingua alba & aspera
 „ fit, ambæ pulmonis partes inflammatae sunt, qui-
 „ bus vero dimidium, una, juxta quam apparetur
 „ Et quibus ad claviculam dolor fit, his superna
 „ pulmonis ala una ægrotat; quibus autem ad ambas
 „ claviculas dolor fit, ambæ supernæ pulmonis alæ
 „ ægrotant, quibus juxta mediam costam media;
 „ quibus vero ad diaphragma, inferna; at totam
 „ unam partem dolentibus, omnia juxta hanc par-
 „ tem ægrotant. „ Hipp. Coac. prænot. Nro 400.



que fuisse. Jam ad arterias venio, experimentumque ponam; quod etsi non semper, tamen sæpe obtinet. Si similis utrinque & arteria radialis est; & utraque arteria similes ramificationes habet; solet pulsus sani hominis in exercitato brachio major fortiorque esse, quam in non exercitato. Si dexter homo est, pulsus major ad carpum dextrum est, minor ad sinistrum: & vicissim, si lævus idem est, pulsum majorem ad lævum quam ad dextrum carpum habet. Inde si quis sani cujuspiam hominis pulsum juxta carpum tangit, poterit ipsi dicere lævusne an dexter sit. Quod faticinium tanquam mirabile imperiti, me ridente, comprehendere non poterant. Idem sæpe contingit, si acutus in una five dextra five sinistra corporis parte dolor est. Arteriæ juxta carpum affecti lateris fortius quam juxta carpum sani lateris vibrant. Si magnus dolor dimidiam capitis partem exagitat, aut acutus dentium dolor unam maxillæ partem vexat, pulsus ad carpum affecti lateris sæpe, (etsi non semper) fortior est; quam ad carpum alterius lateris, in quo dolor non premit.

Juvenis carpentorum faber 22 annorum, AEGROTUS
dexter arteriarum pulsum & fortiorem & XXXIV.
majorem ad dextrum carpum quam ad sinif-



trum habebat, is anno 1772 die 15 Octobris Pleuritide vera tentatus est. Dolor in sinistro latere sextam inter & septimam costam erat. Intra istum dolorem arteriarum pulsus, (quod notatu maxime dignum est) nunc ad sinistrum carpum multo major & durior fortiorque erat, quam ad carpum dextrum. Judicatus est septimo die.

Superato morbo, cum bona valetudo constitisset; iterum arteriæ pulsus, ut olim, ad dextrum carpum nunc major fortiorque est, quam ad sinistrum carpum.

ÆGROTUS
XXXV.

Anno 1773 die 1 Maji, quo tempore Pleuritis popularis erat, juvenis sutor, qui dexter intra sanitatem pulsum in dextro brachio fortiorem quam in sinistro habet, Pleuritide in sinistro latere affectus est. Protinus ut morbus incepit ejus arteria ad sinistrum carpum fortius quam ad dextrum vibrabat.

Superato morbo pulsus item ad dextrum carpum, quemadmodum intra bonam valetudinem consueverat, major & fortior est, quam ad sinistrum.


Per hæc atque similia talia experimenta (quæ hic recitare nimis longum foret) ad credendum inducimur, corpus humanum

con-


cōstare ex duobus semicorporibus media longitudine sibi invicem adunatis, adeoque ad eam dimidiam corporis partem, quæ ægrior altera est *h*), auxiliū præcipue & potius adhibendum esse; quam ad alteram, quæ ita minus ægrotat: ob eandemque rationem e cubito ejusdem lateris, in quo fixus dolor est, sanguinem mitti debere; non ex altera parte, quæ doloris expers est. Quod si quis isti theoriæ non libenter subscribat; ei aliam substituo, quæ item controversiam non admittit. Siquidem, cum arteriæ affecti lateris (veluti id nonnunquam contingit) & magis intentæ sint, earumque pulsus & fortior & celerior sit; utique ipsæ sanguinem majori vi atque impetu in inflammatum focum incutiunt, atque incuneant; ideoque ut has sanguinis furias intra dimidiam istam corporis partem componamus, tutius est, e cubito affecti lateris sanguinem mittere; quam eundem ex adversæ partis, quæ læsa non est, vena trahere.

Verum minimum istud intra curationem peccatum foret, siue sanguis ex affecti, siue ex integri lateris vena mittatur: major in copia, quæ hodie supra vires emittitur, noxa residet:

b) Hipp. loco citato.



refidet: siquidem, cum medici hucusque putassent, quasi omnis totaque morbi culpa in sanguinis crusta confisteret, utique sanguinem tam diu extrahere volebant; donec postremo sanguis crustam amitteret. Verum hi vehementer falluntur, atque ægros in perniciem præcipitant. Non enim (ut supra demonstravi) Pleuritis ob sanguinis crustam est; sed ipsa crusta fit per febrim, quam deposita in latere materia excitavit; hanc materiam si arte tollere, aut ejus focus extinguere nesciunt, frustra crustæ ipsi occurrunt. Deinde crusta (ut supra per exempla docui, & ipsis medicis practicis cognitum esse debet) quo diutius febris insidet; eo densior tenaciorque eadem fit: adeo ut ipsa post postremas sanguinis missiones pejor quam post priores sit. Imo, si omnem sanguinem eximant, semper crustam habebunt, propterea quod crusta toti sanguini inest. Et siquidem aliquando sanguis post aliquas venæsectiones crustæ expers erat; ita non sanguinis missionis causa atque ratione contigit, sed ob id, quod inflammatio ipsa per resolutionem finem accepit: veluti id juxta eos videre licet, quorum Pleuritis tertio die per se finem accepit; quale exemplum supra a me positum est. Falsi itaque fuere; cum venæsectioni




fectioni adscripſſent, quod naturæ beneficio debetur.

Postremo nimia ista atque superflua sanguinis missio vasa debilitat, corpus enervat, sicque utraque imparia efficit morbum superando. Ita nulla esse febrilis materiei neque resolutio neque coctio neque excretio potest i). Ob quod vitium medici etiam eas crises, quæ isti morbo propriæ sunt, non vident; propterea quod morbi ipsius genium mala medendi methodo perverterunt. Debet igitur in his medicus ratione uti; ut neque excedat, neque deficiat. Nulla enim febris sphacelum facit; aliquantum ex febre vel resolvit vel coquit, major febris suppurationem, maxima gangrænam causat.

Ob quem in medendo errorem sæpe obtinet; ut pleuriticorum alii sphacelo extinguantur, alii gangræna jugulentur, alii purulenta tabe consumantur. Igitur ad causam febris, non ad crustam, quæ a febre ipsa est, dirigi curatio debet; id est, ad malam materiam quæ fixa in latere est; a qua febris ipsa evenit, quæ crustam compingit; si curationis

i) „ Sic & vasorum vacuatio, siquidem talis fuit, qualis fieri debet, confert, & bene ferunt. Sin minus, viceversa. „ Hipp. Aphor. 2. Sec. I.



nis successus expectationi respondere debeat. Verumque est, quod celebris olim neque semper iniquus in scholas declamator Helmontius dixit, istam e latere spinam tolli debere; etsi eandem ipse tollere nesciverit. Idem Sanctorius dixit. k)

Qui igitur hanc materiam e latere eximere, istamque spinam evellere posset, is Pleuritidi cito, tutoque mederetur. Nemo tabe, nemo gangræna afficeretur, omnes omnes perinde cito & absque noxa evenirent. Quam curationem, quomodo per longos hucusque annos executus sim, nunc ponam.


C A P U T V.

De mea Pleuritidi medendi ratione.

Ubi aliquem Pleuritide affectum hominem accipio; ejus pulsum in utroque carpo tango. Verum huic, tanquam sæpe fallaci, non protinus fido: potest enim eum ægri aut gaudium, quoniam suum medicum videt, aut
metus

k) „ Pars corporis ut repleta sanguine, vel alio humore, ut in tumoribus, & in ipsa Pleuritide, non est refrigeranda: quia evacuata materia, sponte refrigeratur. „

De medic. Statist. Sect. I. Aph. 101.




metus aut quilibet alius animi affectus vel citare vel resolvere. 1) Ita pulsum aliquoties tango, donec talem constantem esse percipio. Isque morbo proprius esse censetur.

Cognito sic pulsu venam in cubito affecti lateris, ob eas rationes quas antecedente capite posui, incidi jubeo: intereaue temporis, quo sanguis fluit, alterum brachium manu prehendo, in ejusdemque carpo pulsum exploro; scilicet ut ex eo discam, quantum sanguinis mittere conveniat. Quæ certissima regula justaque mensura est. Ridiculum enim est, quod quidam volunt, certas sanguinis, qui mitti debet, uncias statuere; & vanum est ad id vasa assumere, quæ uncias notatas habent: ad sanguinem enim suscipiendum apta multa vasa sunt. Ego ad id planis discis, quales mensuræ imponere consuescimus, utor.

His

1) „ Adeo ut, cum primum medicus venit, sollicitudo
„ ægri dubitantis, quomodo illi se habere videatur,
„ eas (venas) moveat. Ob quam causam periti me-
„ dici est, non protinus ut venit, apprehendere
„ manu brachium: sed primum residere hilari vul-
„ tu, percunctarique, quemadmodum se habeat,
„ & si quis ejus metus est, cum probabili sermone
„ lenire, tum deinde ejus carpo manum admove-
„ re. Quas venas autem conspectus medici movet, quam
„ facile mille res turbant! „ A. C. Celsus Lib. III.
Cap. 6.



His ita ordinatis, si pulsus frequens & contractus est, sanguinis discos duos mitto. Si inter hos pulsus non explicat se, sectam venam claudi jubeo. Quodsi vero idem ad finem secundi disci se explicet, atque major, fortior, duriorque (quod non raro evenit) fiat, tertium discum sanguine impleo. At si pulsus plenus & durus est; quocunque die advocor (sæpe autem non protinus advocantur medici, sed posteaquam morbus per dies insedit) tres sanguinis discos mitto. Inde pulsus mollis, & respiratio liberalior fieri consuescunt. Verum primum istud levamen inconstans esse solet. Paulo enim post, similiter ut ante, spiritus comprimitur.


Post primam sanguinis missionem julepium atque decoctum refrigerans, quale supra dixi, impero. Similem item cibum.

Deinde ægrum quæro, qua hora morbus inceperit: certum enim initium hic morbus habet. Ab ista principii hora in parem frequentis diei horam, (id est per viginti quatuor horas) diem computo, & sic impofterum cæteros dies numero. Quæ attentio in istius morbi curatione permagni momenti est: veluti id paulo magis infra patebit.

Post


Post sex vel octo horas, si ægrum inviso, omnia fere, ut antefuerant, eadem sunt. Itaque si pulsus, qui ante primam venæ sectionem parvus & contractus erat, nunc (ut fieri consuescit) plenus frequens & celer est; duos ex eadem vena sanguinis discos mitto; si vero, (quod admodum rarum est) idem hucusque parvus atque contractus manserit, nec angustior respiratio evenerit; unum sanguinis discum mitto: & tum potissimum iste pulsus explicat se. Illi vero ægro; qui initio pulsus plenum & durum habebat, & ideo tres sanguinis discos miserat, nunc item ex eadem vena sanguinis discos duos mitto; propterea quod nunc pulsus plenum frequentem atque celerem, ut talis æger assolet, habet. Pulsus autem frequentem eum appello; cujus pulsationes dato tempore iusto plures sunt; celerem vero, cujus pulsationes celerem & veluti acutam arteriæ diastolen habent:isque certum inflammationis indicium est. Quæ distinctio medicis & perutilis & scitu necessaria est.

Intra secundum diem post alteram venæ sectionem non multum ex morbo mutatum est; sed solet idem talis manere, qualis post alteram venæ sectionem evenit. Neque unquam isto die facta utilis aliqua hujus mutatio est; nisi forte ad ejus exitum eruptio ad



labia inceperit; quæ nihilominus plena & perfecta tertio die est. Itaque intra istum diem & ante ejus finem sanguinis discum unum, non plus, mitto. Nuncque perinde est, ex altero cubito sanguis mittatur an ex affecti lateris brachio. Si e cubito integri lateris nunc sanguinem mittere placeat; debet fascia atque splenium, quod venam cubiti in affecto latere ligaverat, ante demi; nempe ut nunc ad istum carpum medicus pulsum tangere queat, & ex eo conjecturare; quantum sanguinis mitti debeat: ne arteria, ob ita ligatam venam, sanguine plus intumeat, fortius vibret, & alienum pulsum mentiatur.

Hucusque sanguinem mitto: ejusdemque tantum. Non aliam quoque crustæ, quæ sanguini superest, rationem habeo, quam ut mihi indicet, quid futurum sit. Curationem autem ipsam non dirigo ad crustam; propterea quod ipsa, ut supra demonstravi, non morbi causa sed febris effectus est. Contra, febris materiei ipsi occurrere studeo; in qua attentione totus curationis cardo vertitur. Ob quam rationem, quotiescunque sanguinem mittere opus erit, non sanguinis plus demo, quam expedit ad minuendam febrim; necquicquam autem, veluti imperiti




riti sibi persuadent, ad extinguendam eandem. Debet enim tantum ex febre remanere; quantum sufficit ad febris causam (sive spinam) quæ fixa in latere est, solvendam coquendamque; quo tutius eadem vel tertio vel quinto septimove die e corpore per sudorem atque urinam expellatur. Ad quam cautionem si non attenditur; sæpe obtinet, ut ægri purulenta tabe, posteaquam diu traxerunt, dealeantur. Quod cardinale peccatum eorum est, qui juxta scholas largis venæ sectionibus febrim extinguere & crustam a sanguine demere contentunt. — Qui febre uti nescit, mederi ignorat.

Si fœmina pleuritide laborat, & fluxus sanguinis menstruus instat; sanguinem prius ex cubiti vena, deinde ex pede affecti lateris traho. Quodsi intra pleuritidem menses eruperint, & febris urgeat; nihilominus medium intra istum sanguinis fluxum pedis venam audacter incidi jubeo: Ita enim vel menstruus sanguis fluere continuat; vel, si desistat, idem superato morbo iterum erumpit.

Anno 1780 mense Decembri juvenis mulier pleuritide correpta est, & simul sanguis menstruus erupit. Sanguinem ex incisa pedis vena traxi. Convaluit, non interrupto fluxu menstruo.

ÆGROTUS
XXXVI.



AEGROTUS
XXXVII.


Anno 1780 die 18 Januarii mulierem 40 annorum pleuritisprehendit: supervenit fluxus sanguinis menstruus tanquam flatuto tempore. Sanguinem bis e vena pedis in affecto latere misi: nihilominus ægra per crises quinto & septimo die perfecte judicata est: perinde ac cæteræ quæ sine menstruo erant.

AEGROTUS
XXXVIII.

Vere anni 1780 juvenis mulier fluxæ valetudinis & vitiati corporis habitus pleuritide tentata est. Sanguis bis e cubito affecti lateris missus est. Tertio die sanguis menstruus erupit: vesperi intentus calor est, ob quem etsi fluentibus menstruis tamen sanguinem e pede affecti lateris traxi. Post istam venæ sectionem sanguis menstruus protinus desuit: restituta valetudine idem iterum erupit; & recte fluere continuavit.

Si initio tertii diei (id est post quadraginta & octo horas) oris labia ulcerari incipiant, tunc dolor latus dimittit, Perfecta ista crisis est: neque aliam post se relinquit. In hoc casu priora medicamenta rejicio, & nihil præbeo, quam Roob Sambuci & potum tepidum, quo vitiatus humor omnis ad labia, quorsum natura tendit, tanquam per conferentem locum, feratur. Si sanguis, qui primo die e sexta vena primus missus est, den-


sam



sam crustam habebat, & alter qui eodem die per alteram venæ sectionem extractus est, crustam minus densam habuit; tertius vero sanguis, qui intra alterum diem extractus est, crustæ expers erat: si quoque arteriarum pulsus initio tertii diei (id est post quadraginta & octo horas) plenus & mollis evenit & talis manet, aliquid boni sperandum est: resolutio nempe febrilis materiæ. Tunc enim a medio die tertio (id est, post horas a morbi principio circiter sexaginta) largus sudor acidus ex universo corpore erumpit, atque ad exitum istius diei fluere continuat; post eundemque urina turbida evenit, & multum sedimentum lateri trito simile præcipitat.

Ista crisis item perfecta est, neque aliam post se intra convalescentiam relinquit; propterea quod nulla sanguini crusta post ultimam missionem supererat.


Istum cum hujus tum illius Pleuritidis brevem exitum supra capite secundo per exempla posui. Hunc vix illi medici vident, qui venæ sectiones præcipitant, atque protinus justo plus sanguinis eximunt. Per quam sanguinis jacturam naturam debilitant, eandemque imparem efficiunt, talem crisin perficiendo.



Si sanguis, qui primo die primus missus est, sive crustam habuerit, sive non habuerit; sed si eandem alter, qui secunda vice eodem die missus est, habeat; &, si tertius, qui intra secundum diem missus est, crustam habeat; si deinde ad initium tertii diei (id est post quadraginta & octo horas) pulsus plenus & mollis evenit, & undulans; liberalis Expectoratio ad exitum tertii diei aut ad initium quarti diei (id est post septuaginta duas horas) expectanda est; & fit.

Ubi id obtinet, julapium ex aquæ scabiosæ unciiis sex, nitri drachma, & oxymellis squillitici uncia præbeo; jubeoque ut æger ex eo cochlearia duo unaquaque hora assumat: decocto item refrigeranti oxymellis squillitici unciam adjicio: scilicet ut his sputum, quod exiturum est, promoveam.


Hæc vera signa sunt, quæ sputum prænuntiant & nobis indicant, quo tempore idem arte juvari debeat. Iste morbi exitus item rarus est, eundemque populares medici vix vident, propterea quod nimia sanguinis missione naturam, quæ ante coquere deberet, frangunt atque debilitant, eandemque ineptam ad coquendum reddunt. Ideo vane sputi exitum moliuntur, quoniam protinus talia



talía præbent; quæ tussim movere, sputum-
que (utique quod nondum coctum est) vi ex-
tundere debeant. Illud sæpe non succedit:
sive quod nimium debilis reddita natura fue-
rit; sive potissimum, quoniam febris, cui
mederi nesciunt, pertinaciter subsistit; quæ
ipsa, ut supra demonstravi, sputa necquic-
quam coquit; sed eadem contra, quemad-
modum alias quaspiam excretiones, intus
retinet.

Triste, ajunt, præsagium est; si sputum
coctum ante finem quarti diei (id est ante
nonaginta & sex horas) non ejiciatur. Me-
tuendus enim sinister morbi sive in supura-
tionem sive in gangrænam exitus est. Debet
igitur medicus, si artifex est, ad initium ter-
tii diei (nempe proxime post quadraginta &
octo horas) nosse, sputumne coctum ante fi-
nem quarti diei exiturum sit, nec ne: scili-
cet ut quantocius ea auxilia adhibere possit,
quæ cavere & suppurationem & gangrænam
tuto possint. In qua notitia alter curationis
meæ cardo vertitur; veluti nunc dicam.

Scilicet, si ad id temporis Pulsus non ple-
nus, non mollis, veluti qui resolutionem præ-
nuntiaret, evenit; si idem non plenus, non
mollis, non undulans est, nempe quem pro-



xime sputum sequitur; si eruptiones ad labia non incipiunt; contra si pulsus frequens, durus, irritatus, veluti qualis in ipso fere morbi principio fuerat, hucusque perstat, quoniam is cruditatem morbi significat, indicio est, sputum coctum nullum ante finem quarti diei exiturum esse.

In tali morbi statu emplastrum vesicatorium latum ad affectum latus applico: scilicet ut inflammationis focum, id est febris materiam (spinam) loco moveam. Si media sub mulieris mamma dolor est, emplastrum infra mammas pono. Si curta mulier est, & magnas mammas habet, adeo ut in latere locus non pateat, vesicatorium inter scapulas pono. Possent etiam ob eandem rationem cucurbitulæ affecto lateri applicari, quæ febris focum dimoveant. *m*) Mixturam præsto

m) „ Tunc cucurbita iisdem locis cum scarificatione
 „ adhibenda, sed demissionis tempore. — Leves
 „ autem quas *κυσσους* appellamus, etiam in accessione
 „ adhibere possumus, & frequentes, atque multis
 „ partibus. — Themison jubet etiam cum scarifi-
 „ catione adhiberi cucurbitam declinante accessio-
 „ ne, cum sit adjutorii genus restrictivum, &
 „ propterea proprium dimissionis. „ Cælius Aure-
 „ lianus acut. morb. Lib. II. Cap. 29.

Cucurbitulas cum scarificatione post septimum diem
 probat Aretæus Lib. I. de acut. morb. curat. Cap. 10.

„ Remedium


sto ex aquæ scabiosæ unciiis sex, nitri drachma, extracti corticis peruviani drachmis tribus, oxymellis squillitici uncia: jubeoque ut æger ex ea per unamquamque horam cochlearia duo assumat: sic ut intra quenquam diem per viginti quatuor horas extracti corticis drachmas circiter sex accipiat. Decoctum refrigerans adjecto aceto vini destillato, & syrupo rubri idæi, ut supra posui, impero; diætam item.

His ita ordinatis & continuo assumtis, a medio diei quinti (id est, post horas centum & octo) plurimus sudor acidus ex universa corporis cute erumpit, atque ad finem usque ejusdem diei fluere continuat. Urina quæ proxima circiter ad finem ejusdem diei emititur, crassa est, turbidaque fit, & multum sedimentum lateri trito simile deponit: simul & dolor latus dimittit, pulsus mollis & explicatus est, & æger libere spirat: item somnus est.

D 5

Per


„ Remedium vero est magni & recentis doloris,
 „ sanguis missus. At, si levior, si vetustior
 „ casus est, vel supervacuum, vel serum id auxili-
 „ lium est; confugiendumque ad cucurbitulas est;
 „ ante summa cute incisa. Recte etiam sinapi ex
 „ aceto super pectus imponitur, donec ulcera pustu-
 „ lasque excitet. „ A. C. Celsus Lib. IV. Cap. 6.
 de lateris doloribus.



Per sextum diem & per septimi dimidiam primam partem æger simili sudore madet; verum non ita multum, ut ante, exsudat. Urina item similiter turbida est, simileque sedimentum præcipitat: rarum est, sexto die urinam pellucidam esse; &, si est, nubeculam ea habet, & bonæ notæ est. Nunc, quoniam somnus est, vigilantî mixturam præbeo, dormienti non: sic ut intra viginti quatuor horas extracti corticis drachmas tres accipiat.

At a medio die septimo (id est, post horas centum quinquaginta & sex) plurimus item talis sudor erumpit, atque ad finem ejusdem diei usque liberaliter effluere continuat. n) Sequitur circiter ad finem ejusdem

n) „ Sudor optimus quidem est, qui febrim in die
 „ judicationis solvit, commodus autem est & qui
 „ levat. „ Hipp. Coac. prænot. Sect. III. Nro 237.
 „ Sudores enim optimi sunt, & celerrime febrim
 „ sedant, qui in judicatoriis diebus fiunt, & febrim
 „ perfecte summovent. Boni quoque sunt, qui per
 „ totum corpus fientes, morbum facilius ferre faciunt.
 „ Quî vero nihil horum faciunt, incommodi
 „ sunt. „ Lib. de Judicat. vers. I. & prænot. Nro 10.
 „ Sudores febricitanti si fiant 3. 5. 7. 9. 11. 14. 21
 „ & 31. Hi sudores morbos judicant. Qui vero non
 „ sic fiunt, dolores significant. „ Ibidem vers. 4.
 „ & aphor. 36. Sect. IV.




dem diei, urina crassa, turbida, quæ item sedimentum lateri trito simile præcipitat. o)

Atque nunc æger per istas crises imparibus diebus, perfecte sanus evasit, sine sputo & absque suppurationis gangrænæve periculo.

Ista crisis Pleuritidi propria & naturæ operanti consentanea est. Hanc ipsa natura, dummodo ei recte succurritur, mollitur & exequitur; veluti superiore capite secundo exempla posui eorum, qui ita evenerunt, nullis nisi refrigerantibus auxiliis adjuti & absque corticis peruviani subsidio. Tali mendendi ratione, non alia, a longis hucusque annis semper, etiam in desperatis fere casibus, cum succèssu usus sum. Cæteræ curationes violentæ atque a morbi genio alienæ sunt.

Si

-
- o) „ Cloacho lateris dolor, & febris. Remisit febris, „ sudavit per totum corpus. In urina multa erant, „ quæ ferebantur, ac innatabant, postea turbata „ est. „ De Morb. popul. Lib. VII. Sect. I. vers. 21. „ At (Urina) subrubra, & subsidentiam subrubram „ habens & levem, siquidem ante septimum diem „ prodeat, septima die liberat. „ Coac. prænot. Sect. III. Nro 245. „ In pleuriticis urina subrubram „ habens levem subsidentiam, securam judicationem „ significat. „ Ibidem 290.



Si infantes, quos neque movere ratio neque persuadere verba possunt, Pleuritide laborant; his suavem quenquam syrupum offero, cui extracti corticis peruviani tantumdem ammisceo, quantum habita ratione ad adultorum ætatem sufficit. Ita sanatæ sunt nobiles puellæ. *

Ita potest unusquisque medicus, qui tali medendi methodo utitur, certo prædicere, eum, qui ad exitum quinti diei ita sudavit, & talem urinam accepit, similiter eundem & sudorem eandemque urinam ad exitum septimi diei habiturum esse, & tunc integre sanum fore. Hoc enim faticinium isteque morbi exitus non fallit, si æger ante sanus nec alio quopiam antiquo morbo vitiatus fuerat.

Sed est alia adhuc quædam crisis, quam Pleuritis cum cæteris febribus communem habet; rara quidem & infrequens: regius nempe morbus, quem Icterus vocant. Isque fit, ubi pleuriticæ febris materia ad hepar transfertur. p).

Anno

* Aegrotus XXIV.

p) „ Morbus regius fit aliquando criticus, id est, judicæ
„ cætorie: „ Galenus in 4to Lib. Aphor. aph. 62.




Anno 1776 mense Junio servus fellarius, ÆGROTUS
XXXIX.
juvenis & qui infirmum pectus habebat, Pleuritide in dextro latere correptus est. Secta ejus vena præstitumque decoctum refrigerans atque julapium est: secta item vena, simul & ad affectum latus applicatum emplastrum vesicatorium est. Tertio die Extractum corticis peruviani julapio adjeci: magnus enim erat calor flammeus metusque Gangrænæ. Repetitæ in diem septimum usque venæ sectiones, at parvæ, sunt.

Die octavo dolor latus omnino dimisit, isque nunc vehemens in hepatis regione ortus est cum intento calore. Quare item sanguinis discum unum extraxi.

Ad exitum noni diei arteriarum pulsus mollis evenit, deinde plenus, ægerque convaleuit absque sputo. Intra convalescentiam vero orti magni abscessus sunt, cum quo loco Vesicatorii plaga ante fuerat, tum e directo in dorso: etiam circum hepatis regionem. Qui omnes abscessus scalpello incisi sunt.

Istius ægri febris die nono judicata est. Crusta intra convalescentiam cocta est; abscessit post.

Anno 1773 die 28 Junii cantor in latere ÆGROTUS
XL.
dextro Pleuritide correptus est. Ejus pulsus
brevis




brevis & concitatus erat. Ut adveni vesperi sanguinis uncias circiter decem e vena misi. Is crustam albam lardaceam habuit. Postero die mane tantundem sanguinis extraxi, qui similem crustam habuit. Vesperi sanguinis uncias circiter octo. Julapium decoctumque refrigerans atque victum tenuem imperavi: enema vesperi.

Initio tertii diei (id est, proxime post horas quadraginta octo) pulsus parvus & frequens erat, qui necquicquam significabat, quod sputum ante exitum quarti diei coctum futurum sit. Ob quam causam emplastrum vesicatorium latum affectæ plagæ imposui, & julapio drachmas tres extracti corticis peruviani adjeci. Urina clara erat cum nubecula.

Ad exitum quinti diei sudor erupit quidem, verum urina ipsa non turbata est (non erat crisis completa) Ideo prædixi, quod septimo die nulla crisis per eruptionem, sed per metastasin futura sit; cujus quidem locum, in quo materia subsessura sit, nondum scirem. Interea pulsus post istum sudorem fortior evenit.

Etiam septimo die neque sudor erupit, neque turbida facta urina est; sed contra, pulsus brevis & concitatus devenit, intumuit

ab-




abdomen veluti tympaniticum, quod percussum resonabat: respiratio densa evenit, dolebat æger e regione hepatis, inquietus erat, calore exarsit. Urina bile tincta erat; similiter cutis aliquantum. Utique crisis per metastasin fausto die septimo. q)

Ex hujus vena sanguinis uncias sex, & post tres horas tantundem extraxi; uterque pelle mucosa flava tinctus erat. Emplastrum vesicatorium latum inter scapulas positum est, & inditum omni trihorio enema ex feri lactis libra, nitri drachma, & mellis uncia.

Die undecimo (impari) collapsus ventris tumor est, multusque mucus coctus alvo secessit, & ægrum die decimo quarto (critico Hippocrati celebri) ad integritatem perduxit.

Post octo dies homo in febrim intermittentem quotidianam incidit, intraque eandem multum mucii cocti infra emisit; cumque sic alvus pura evenisset, febris ægrum post septem accessiones (numero item impares)

-
- q) „ Quibus in febribus morbus regius fit ante septimum
„ diem, malum. „ Hipp. aph. Lib. Sect. IV. aph. 62.
„ Quibus in febribus morbus regius septima aut
„ nona aut decima quarta accedit, bonum, si non
„ præcordium dextrum durum fiat, sin minus, non
„ bonum. „ Ibidem aphor. 64.



pares) dimisit. Erat profecto iste mucus a crusta sanguinis per convalescentiam, cum vires icterum inter & febriam satis constitissent, coctus atque ad intestina delatus.

ÆGROTUS
XLI.

Anno 1784 die 15 Februarii mulier pleuritide vera affecta est. Accessit quarto die aurigo. Judicata est ægra die septimo, & die nono per sudorem & per urinam, quæ sedimentum lateri trito simile præcipitavit.

ÆGROTUS
XLII.

Anno 1783 die 27 Aprilis servus 60 annorum Pleuritide vera affectus erumnose habuit. Sexto die Ictero male tinctus est, sine levamine. Judicatus est septimo die per sudorem & per urinam quæ sedimentum lateri trito simile præcipitavit. r).

Omnium maxime rarus Pleuritis exitus per parotidem, perve urinam puriformem est. Utrumque intra triginta octo annos semel vidi.

ÆGROTUS
XLIII.

Anno 1749 die 27 Decembris milier 50 annorum Pleuritide vera tentata est, intra quam etiam cum adhibitis iis auxiliis, quibus medici tunc temporis uti consueverant, exitiose habuit.

Erupit

r) „ Quibus in febribus morbus regius fit ante septimum diem, malum. „ Hipp. ibidem.




Erupit undecimo die (impari) juxta auriculam dextram tumor cum dolore, simul & imminuta cætera mala sunt. Impositum cataplasma suppurans est, sub quo factum pus est. Extracto per incisionem pure ægra prospere habuit.

Anno 1749 die 6. Martii faber tignarius incidit in Pleuritidem. Secta vena est, adhibitaque medicamenta refrigerantia, & fomenta emollientia sunt, imperatus item victus tenuis est. ÆGROTUS
XLIV.

Medio die tertio dolor latus dimisit, ægerque, etsi absque sputo, melius habuit.

Quarto die incepit urina turbida, crassa, alba, & pinguis fieri, quam æger cum dolore emisit, & quæ multum puriforme sedimentum deposuit. Ob quam rem fomenta renibus atque pubi imposui, decoctumque diureticum Potui dedi. Cum multa tali urina æger quinto & septimo die bene habuit. Octavo ad suum opificium sanus reversus est.

Atque nunc mea Pleuritidi veræ medendi ratio exposita est; cita, tuta atque facilis; quæ semper succedit, & nunquam fallit, quotiescunque morbus sanum corpusprehendit.



His etsi ita demonstratis tamen insuper non inutile erit, ad confirmandam veritatem unicum exemplum adduxisse; per quod vitia usitatæ curationis præstanti nostræ medicationi invicem opponantur; scilicet ut eo magis veritas elucescat. Ad id proximum exemplum sufficiat.

ÆGROTUS
XLV.

Anno 1765 initio veris juvenem viginti trium annorum Pleuritis subitoprehendit. Erat ei ingens calor & acutus in latere quartam inter & quintam costam dolor, qui spiritum præcepit & tussim excitavit, quæ nihil nisi tenax sputum cum labore traxit, striis cruentis nonnunquam interstinctum: arteriarum pulsus frequens & celer erat.

Huic tantum sanguinis per plures dies e vena missum est, quantum per vires licuit; omnis cruor tenui alba crusta tectus erat. Præstita julapia refrigerantia sunt, & potus ex mollibus herbis in aqua coctis, adjecto multo nitro & oxymelle: imposita supra affectum latus fomenta emollientia sunt: cibus tenuis datus est ex sorbitionibus.

Manfit acutus in latere dolor, & frequens arteriarum pulsus, & spiritus difficilis, & nihil ultra sputi evenit, & urina flammea.



mea. Applicata igitur sunt emplastra vesicatoria lata, latissimum supra affectum locum.

Accessit circa octavum diem delirium, quod magis noctu quam interdiu continuavit.


Mutata curandi ratione modoque isti ægro Extractum corticis peruviani præstiti, suo adjectum julapio. Inde calor inclinavit, urina citrea evenit, & post aliquot dies delirium desinit, postea pulsus aliquantum mollis & plenus factus est. Deinde quo plus corticis æger assumsit eo magis imminutus in latere dolor est, & spiritus liberior evenit. Postremo cutis sudore immaduit & urina turbida evenit cum sedimento lateri trito simili: accessit somnus; & post tres septimanas, cum æger multum corticis assumsisset, reversa bona valetudo est absque sputi sive coctione sive excreatione: contra ac Hippocrates metuebat. (s)

Nunc ad Pleuritidem venio, quæ in vitium corporis habitum incidit.

Anno 1771 strenuus & veteranus generosi vini potator & mali corporis habitus, AEGROTUS
XLVI.

E 2 postre-


s) „ Quicunque pleuritici fientes in quatuordecim die-
 „ bus non repurgantur, his ad suppurationem trans-
 „ itio fit. „ Lib. Aphor. Sect. V. Aphor. 8.



postremo hydropicus evenit. Erat ei aqua in pectoris cavitate, in abdomine plus quam viginti libræ aquæ, aqua etiam multa inter cutim, cum maximo a planta pedum ad ventrem usque tumore: arteriarum pulsus parvus & inæqualis erat, urina crassa, rubra, sordida, vix trium unciarum per viginti quatuor horas: pejores noctes quam dies erant: æger sæpe anxietatibus agitabatur & veluti strangulatus spiritum cum labore duxit. Ita per diversa medicamenta quatuor menses traxit.

Adhibita squilla omnem fere aquam intra duos menses per lötium expulit. Iste æger ita debilis cum convalescere cæpisset, & aquæ quidquam inter cutim remansisset, Pleuritide, quæ ea tempestate popularis erat, correptus est.

Primo istius morbi die sanguinis discum unum misi; nam plus mittere vires, veluti pulsus indicabat, non concedebant. Julapium dedi & decoctum refrigerans quale cæteris ægris. Altero die sanguinis iterum discum unum extraxi, isque mucosus & pelle indutus erat. At quoniam ad exitum secundi diei pulsus, ut ante, debilis mansit, superiori julapio Extracti corticis peruviani drach-



drachmas tres adjeci. Inde urina quæ crassa fordidaque hucusque fuerat, nunc quarto die pellucida evenit cum nubecula. A medio diei quinti ad ejus finem usque multus sudor acidus ex universa cute erupit, secuta urina turbida est cum sedimento lateri trito simili. A medio die septimo similis sudor, similisque urina; ægerque absque sputo nunc bene sanus factus est, & hodie dum prospere valet.

Anno 1769 die 25 Martii, quo tempore ÆGROTUS
XLVII.
Pleuritis popularis erat, mulier macra, quæ habitum corporis oculosque tales habebat, quales hi habere consuescunt, qui phthysici futuri sunt, suam prolem per annum lactaverat. Post ablactationem orta tussis sicca est, quæ quatuor septimanas traxit. Cum ista tussi mediam intra tempestatem frigidam mulier navim ascendit, adverso Rheno fluvio Moguntiam itura.

Advena acerbe tussit; tussim secutus dolor pectoris est, qui in latere fixit se; sicque confirmata vera Pleuritis est.

Sanguis ter e vena missus tenacem crustam habuit. Vesicatorium affecto lateri impositum, adjectumque julapio Extractum corticis peruviani est. Secutæ alvi sedes putridæ sunt.




Urina, quæ hucusque tenuis erat, nunc recto tempore turbida evenit, & sedimentum lateri trito simile præcipitavit, erupit etiam multus sudor acidus pinguis. Omnisque cum antiqua, tum nova tussis, dolor item atque totus morbus absque sputi excreatione desit. Sic quoque pleuritica febris, ut quæpiam alia, etiam vetustis malis mederi potest.

ÆGROTUS
XLVIII.

Anno 1767 initio mensis Junii mulier 73 annos nata, gibberosa, & quæ a longis hucusque annis vitiosi corporis habitus erat, sæpe anghela, cum œdematosi pedibus, subito Pleuritide correpta est. Initio frigus erat, magna corporis fatigatio, angustus spiritus, acutus in dextro latere inter veras costas dolor, tussis simul arida. Finito frigore ortus vehemens calor est, sitis ingens, factæ aridæ fauces sunt, respiratio præcepta, tussis urgens, dolor intentus. Præter hæc universa corporis cutis aurigine tincta est, quasi insuper ab inflammato hepate. Arteriarum pulsus parvus, frequens & celer erat. Tussis nihil emolita est: totumque corpus vehementer lassum erat.

Missæ ex hujus vena sanguinis uncix circiter duodecim sunt, crustam albam habentes. Imposita affecto lateri fomenta sunt,
præ-



præstitum julapium refrigerans est; decoc-
tum refrigerans Potui erat; cibo forbitiones.
Extractus item vesperi sanguis ad uncias cir-
ci : decem est; isque magis densam crustam
l. buit; postero die tantundem; rursum ves-
peri unciaë quinque; sanguis item tenacem
crustam habebat,


Inde liberior facta respiratio ipseque pul-
sus aliquantum explicatus est; tussis item,
etsi difficilis, tamen sputum, utique crudum,
tenax, ruffum, trahens, emolita est.

Tertio die (propterea quod pulsus nul-
lam coctionem fore significabat) superiori ju-
lapiio Extractum Corticis peruviani adjeci,
sic ut ejus drachmæ sex intra viginti quatuor
horas consumerentur. Emplastra item vesi-
catoria tria imposui, latissimum vero affectæ
parti.

His minutus dolor compositaque acerba
tussis est; utrimque die quinto requies erat.
attamen vigiliæ supererant, & amplius tincta
colore flavo cutis est.

Die septimo sudor acidus erupit, qui
spiritum liberum effecit, & omnem e latere
dolorem excussit.

At vesperi reversa febris est; intraque
eandem genæ intense rubebant; maxime ve-



ro dextra gena, quæ & profundius rubebat, & magis quam sinistra exardebat; scilicet ob id quod vitium in dextra hepatis parte residebat. Intra istam febrim per proximum diem delirium erat: noctu vero requies.

Ob quam causam ægræ inditum enema ex fero lactis, nitro, atque melle est; quod plurima putrida & mucosa subtraxit.

Ortum nono die putridum alvi profluvium est multa mucosa trahens: quod & febrim & flavum cutis colorem delevit.

Cumque imposterum ægra per enemata perque leves alvi purgationes omnia putrida deposuisset, omnino convaluit.

Hujus judicationes omnes imparibus diebus contigerunt.

ÆGROTUS
M. M.

Virgo 63 annorum ob inveteratam Arthritidem contracta crura, brachia, manusque habebat; cum nodosis articulis; sicque omni motu orba, quinque hucusque annis lecto affixa erat. Immobile corpus factum matesani habitus est; ipsumque foco, clausisque fenestris portaque a custodibus fovebatur. Nihilominus inclusam istam ægram Pleuritis vera anno 1781 die 18 Novembris perinde ac sanum quenquam corripuit. Acutus




tus dolor fixus in dextro latere sextam inter & septimam costam erat; horror ante, calor post: respiratio angusta, tussis acerba, quæ sputa cruda, ruffa emolita est; pulsus frequens contractusque.

Protinus sanguinem e vena brachii ipsius lateris, in quo dolor preffit, misi ad discum unum, tantundem vesperi. Postero die item non plus disco; qui densam crustam habebat: nil ultra missum est, vires sustinendi causa. Imperatus victus tenuis est, datus refrigerans potus, & oblata mixtura cum extracto corticis peruviani est.

Ad exitum quinti diei multus acidi odoris sudor erupit: urina sedimentum lateri trito simile præcipitavit. Die septimo similiter: hisque Pleuritis finem habuit.

Pejor morbus est, quoties Pleuritis, veluti non raro contingit, cum putrida in imo ventre saburra convenit: accensa enim per pleuritidis febrim tali putrilagine febris putrida fit, quæ ipsa pleuritidem malignam efficit. Pessimum est, si ista morborum complicatio in vitiatum corporis habitum incidit. Hic duo hujus generis exempla sufficiant.

Anno 1768 die 23 Junii vetula 74 annos AEGROTUS
nata, gibberosa, anghela, quæ a longis huc- L.




usque annis vitii corporis habitus erat, cum œdematosi pedibus, & superiore anno, veluti paulo ante memoravi, * in dextro latere pleuritidem cum hepatis inflammatione passa erat, nunc eodem morbo in sinistro latere quintam inter & sextam costam affecta est. Erat ei spiritus difficilis, tussis acerbæ & præcepta, calor, sitis, febris non nimium, articularum pulsus parvus & frequens.

Ex hujus vena non multum sanguinem trahi jussi; vesperi item, cum ita per vires licuisset; isque crustam habuit; altero die item sanguinem qui similiter crustam habuit. Isti ægræ eadem auxilia, quæ cæteris ægris, adhibita sunt.

Tertio die intentæ arteriæ sunt earundemque pulsus convulsivus erat; ex quo novi, quarto die sputum coctum non fore. Quare emplastra vesicatoria tria applicavi, & superiori julapio extracti corticis peruviani semunciam adjeci.

Intentus calor est; ortæ sunt inquietudines, genæ factæ rubræ sunt, cutis ardens, vigilæ erant, atque subdeliria. Accessit
quinto

* Aegrotus XLVIII.



quinto die putridum alvi profluvium, jactationes & corporis denudationes.

Septimo die multus sudor viscidus & olens erupit, atque urina turbida evenit, & ægra perfecte convaluit. Superato morbo mulier multum muci e naribus emunxit, talemque screando ejecit, qui falsum saporem habebat.

Post, cum vires satis constitissent, secutæ sunt alvi sedes meracæ putridæ, quæ multum muci excusserunt.

Anno 1769 die 22 Januarii Virgo supra ÆGROTUS
LI. 42 annos nata, a parentibus malesanis genita, ipsa a primis fere cunabulis cachectica, post ex fluxionibus surda facta & dentibus per cariem orba, per longos annos cum ægro pectore tussiculosa, & quæ sæpe multum sanguinem sputo ejecerat: ista incidit in veram pleuritidem.

Protinus e vena missus sanguis floridus erat, alter crustam habuit, tertius crustæ plus, quartus plurimum.

Arteriarum pulsus frequens & celer erat, cutis calor ardens, spiritus difficilis, tussis arida.

Applicata sunt quatuor emplastra vesicatoria lata, latissimum vero supra affectum locum.




locum. Datus est potus refrigerans, julepium item cum extracti corticis peruviani semuncia & plus, quotidie ab ipso morbi initio ad ejus exitum usque.

Erat calor summus, genæ rubræ, deliriumque, maxime cum invesperasceret.

Nono die calor remisit, pulsus mollis evenit, alvus semel laxa putrida, tussis humida quandoque sputum non coctum trahens, spiritus liberalior absque sputo cocto, insudationes nonnumquam, somnus trium horarum, mens recta. Per noctem a nono in decimum usque diem sudor largus. Alvi putrida dejectio bis.

Idem sudor per decimum diem continuavit; intraque eundem alvus ter liquida putridaque: nox tranquilla erat. Mane ad diem undecimum alvus similiter semel laxa; ægraque nunc optime habuit. Imposterum per convalescentiam cætera putrida infra secesserunt.

In tali morborum conventu cortex peruvianus, ut alia quævis amara, putrida quæ in intestinis resident, movet atque leniter expellit, maximeque si adjectum eidem oxymel squilliticum est.



A pleuritide ad peripneumoniam transeo; de qua item, ut superiore capite quarto dixi, inter medicos disceptatum est; inter quos alii pleuritidem ob inflammata[m] pleuram esse volunt, peripneumoniam vero ob inflammatum pulmonem: alii ob pulmonis inflammationem pleuritidem esse contendunt: qui inter hos medium tenere, pleuropneumoniam appellare morbum malunt. Hippocrates ipse modo pleuritidem ut privatum morbum habuit; t) modo eandem perinde ac peripneumoniam habuit. u) Cælius Aurelianus utrique morbo unam eandemque causam tribuit. x)


Petrus

t) „Ex pleuritide peripneumonia malum., Sect. VII. aph. II.

„ Ex peripneumonia pleuritis malum., Aphor. 12.

u) „ — Liberationem a morbo significat lingua, si-
„ militer velut in pleuritide. „ Lib. de diebus judi-
catoriis §. 8. de peripneumonia.

x) „ Perficiunt hanc passionem causæ quæ etiam pleu-
„ riticam faciunt. — Nam frequentius antecedente
„ pleuritica, peripneumonia sequetur. — Hanc
„ igitur diffiniens passionem Demetrius Herophilus
„ libro duodecimo de passionibus, peripneumonia,
„ inquit, est tumor in toto pulmonis corpore, ex
„ parte enim si fuerit, pleuritis dicitur. „ Acut.
mor. Lib. II. cap. 25. de peripneumonia. „ At enim
„ omnem inquit Pulmonem pati Herophilus. Si ve-
„ ro febrim, inquit, fuerint passi, pleuriticam
„ facit. „ Ibidem cap. 28. „ Item Praxagoras ean-
„ dem pleuriticorum atque peripneumonicorum tra-
„ didit curationem. „ Ibidem.



Petrus Servius Romæ in trecentis pleuriticis, post mortem dissectis, semper lobum pulmonis infectum, materiaque repletum conspexit; pleura aut nihil omnino ad sensum vitata, aut leviter tantum quodammodo inquinata. y) Ego nonnisi unius ob pleuritidem mortuæ mulieris incisum cadaver vidi, cujus pulmo sphaceli stygma habebat, pleura vero necquicquam affecta erat. Sed omne dubium controversiamque tollunt experimenta Valsalvæ, Morgagni, & multorum aliorum; quæ demonstrant, pleuritidem non a pleuræ sed a pulmonis inflammatione esse. z)

ÆGROTUS
LII.

Anno 1767 die 5 Februarii vir annorum 39 febre affici cæpit cum spirandi difficultate, tussi, atque angustiiis. Hujus vena, jubente suo medico, bis secta est, indita quoque enemata refrigerantia sunt.

Istum ægrum cum altero die acceperissem, maxime talem habui: erat ejus febris summa, spiritus laboriosus, tussis vexans, & arida, cutis ardens, pulsus frequens & celer, urina rubra,

(y) F. Hoffmann Med. ration. Tom. IV. P. I. Sect. II. Cap. VI. §. 2.

z) Joan. Bapt. Morgagni de sedib. & caus. Morb. Lib. II. Epistol. 20 & 21.


rubra, angustia, vigilia, iactationes: &, si-
quid æger sputo emolitus est, idem tenax,
ruffum, cruentum erat. Inflammatus pul-
mo erat.

Hujus venam protinus hoc die secari, &
iterum vesperi jussi: sanguis crustam habuit.
Julapium refrigerans cum nitro & oxymelle
præstiti; potum item refrigerantem atque
forbitiones. Metuendus autem ideo malus
istius morbi exitus erat; cum quoniam æger
olim plurimum sanguinem sputo ejecerat,
tum quoniam idem olim costas a percussione
fractas habebat.

Erat ejus febris continens, quæ vesperi
vehementer exacerbata est. Ob quam cau-
sam die tertio secta item, quinta vice, vena
est; extractusque ex ea sanguis tenax, gluti-
nosus, non consistens erat.

Intra istum tertium diem arteriarum pul-
sus neque mollis neque undulans erat; ob
quam notam præscivi, quod ante finem quar-
ti diei sputum coctum non exiturum sit; id-
eoque vel septimo vel decimo die metuen-
dam gangrænam esse. Ob quam causam Ex-
tractum corticis peruviani superiori julapio
adjeci.

Accessit



Accessit quarto die (pari nempe & recidivis obnoxio) acutus in latus sinistrum dolor pleuriticus, a quarta costa vera ad infimam usque. a) Quare quatuor emplastra vesicatoria lata brachiis atque cruribus, quintum vero latissimum affecto lateri imponi jussi. Secutum plus quidem sputi est; at idem tenax, ruffum, sanguinolentum mansit.

Die quinto omnia, ut supra, mala. Accessit noctu leve quoddam delirium. Sexto aliqua Exanthemata juxta oris labia eruperunt. Mansit continuus calor, angustiae, vigiliae, urina flammea. Erant enim istae mutationes paribus diebus, quarto nempe & sexto.

Septimo die cutis sudore aliquantum immaduit. At noctu largus sudor plurimaque simul urina, quæ rubrum colorem amisit, erupit. Plurimumque nunc ex febre & ex sputi vexa minutum est (prima pars perfectæ criseos die impari.)

Octavo die & idem sudor & eadem urina continuaverunt, minutum sputum est, respiratio liberior evenit, accessit somnus. Denique die nono urina turbida evenit, & sedimentum

a) „ Ex peripneumonia pleuritis, malum. „ Hipp. Sect. VII. aphor. 12.




mentum lateri trito simile præcipitavit; ægerque convaluit sine sputi sive coctione sive excreatione (die nono, item impari, completa est crisis.)

Anno 1783 die 17 Februarii vir 60 annorum Peripneumonia vera correptus est. AEGROTUS
LIII.
Missus e vena sanguis crustam crassam, densam, viridemque habuit.

Positum inter scapulas largum vesicatorium est; datus potus refrigerans est, julepiumque cui adjectæ Extracti corticis peruviani drachmæ tres sunt.

Tussis absque sputo erat. Medio die quinto largus sudor erupit, proximeque post urina turbida evenit, & sedimentum lateri trito simile præcipitavit. Nunc æger tussis expers die sexto, etsi non multum, tamen sudavit, & similem urinam emisit. At septimo die iterum plurimum sudavit, urinamque crassam minxit, quæ sedimentum lateri trito simile deposuit. Proxime cum bona valetudine.


Ut Pleuritidis in Peripneumoniam ita Peripneumonix in Pleuritidem transitus fieri potest.



ÆGROTUS
LIV.

Anno 1784 medio mense Februario vir robustus 36 annos natus Catarrho affectus est; quem nihili habuit. Ex catarrho facta Peripneumonia est. Sanguinem e vena misit. Altero Peripneumonia in Pleuritidem veram transiit. Extractum Corticis peruviani sumsit. Tertio die insudavit, & urinam emisit, quæ turbida facta sedimentum lateri trito simile præcipitavit, simul & exulcerata oris labia sunt, nasusque: sic æger quamproxime convaleuit.

His consideratis ad credendum persuadeor; esse pleuritidem peripneumoniamque unum eundemque morbum & unam utrosque causam habere. Nempe Peripneumoniam esse, ubi profunda pulmonum inflammatio citra acutum dolorem est; pleuritidem vero, si exterior pulmonis portio cum succingente sua membrana, a qua ipsa acutus dolor venit, inflammata sit. Ob quam rationem atque similitudinem utrique morbo, ut Praxagoras voluit, eodem modo occurro. Simile exemplum proximo capite obveniet.



CAPUT VI.

De Crisi, quæ intra Convalescentiam fit.

Excussa pleuritide secretiones atque excretiones, quas febris ante retinuerat, nunc iterum liberaliter perficiuntur. Ita phlegmaticus vir, * de quo superiore capite quarto dixi, sputa quæ intra sanitatem ejicere consueverat, & quæ pleuritis superveniens cohibuerat, deinde superata febre iterum ut ante ejecit. Ita monialis virgo ** sputa cocta catarrhi, quæ pleuritis, cum incidisset, cohibuerat, eadem post istum morbum denuo rejecit. Ita *** phthysicorum purulenta expectoratio, quam pleuritica febris retinuerat, iterum post submotam pleuritidem liberalis evenit. Similiter nutricis **** lac, quod pleuritis, quæ incidit suppresserat, denuo intra convalescentiam revenit, quo suam prolem imposterum nutrit. Ob eandem causam juvenis mulieris lochia intra pleuritidem tamdiu retenta fuerunt, usque dum pleuri-

F 2

tis

* Aegrotus XXVI.

** Aegrotus. XXVII.

*** Aegrotus XXVIII & XXIX.


**** Aegrotus XXX.



tis ipsa finem habuerat: excussa vero pleuritide Lochia, quemadmodum a recenti partu, eruperunt. Ita aquæ quæ per morbum intus retentæ fuere, deinde, cum sanitas consistere incipit, iterum exitum per urinam sumunt. Similiter sanguinis serum, quod per pleuriticæ febris æstum in tenacem crustam compactum erat, imposterum intra convalescentiam atteritur, coquitur, atque spuendo ejicitur; aut tardius per abscessus, furunculos nempe, vel per bubones, exernitur; aut postremo per alvum excutitur. Verumque est, quod olim Hippocrates dixit, crisin, ut sit perfecta, debere esse universalem: non ut ea ex universo corpore, veluti sudor, protinus omnis erumpat; sed ut imposterum omnes humores, qui per morbum intus retenti fuere, intra convalescentiam trans eas vias tanquam per conferentes exitus eliminentur, trans quas iidem intra bonam valetudinem secundum naturam exire consueverant.


Incipiam a crustæ exitu per sputum coctum, propterea quod in ista evacuatione Medicorum & disputationis & theoriæ & curationis cardo hucusque male vertebatur: scilicet a qua notitia ægrorum & salus & perniciēs dependet.

Itaque,



Itaque, quod ante omnia nosse interest & satis superque a me supra demonstratum est, Pleuritis non ob sanguinis crustam est; sed contra, crusta ipsa per febris ardorem ut in cæteris inflammationibus ita intra pleuritidem fit. Ista crusta post morbum per convalescentiam, intra quam vires magis quam intra morbum consistunt, coquitur atque expellitur per diversos corporis exitus, per quos eadem post alios quosque inflammatorios morbos eliminari consuevit.

Et primo quidem per sputum crusta cocta expellitur. Id celebre juvenis fabri ferarii exemplum, quod supra capite quarto posui, præ ceteris satis superque demonstrat. Hujus enim sanguis qui septima vice initio septimi diei missus est, crustam & magis densam & magis tenacem habuit, quam qui ante extractus erat. A medio septimi diei sudor multus acidus erupit, & ad exitum ejusdem diei urina turbida evenit, quæ sedimentum lateri trito simile deposuit. Iste sudor & ista urina febris crisis erant, & protinus arteriarum pulsus plenus & mollis evenit. Imposterum per vires intra convalescentiam cocta crusta est, eademque die decimo tertio ut cera alba semiliquefacta sputo ejecta est.



Simili exemplo ibidem monachus est; qui undecimo die per sudorem judicatus est, & deinde sputa cocta ejecit.


ÆGROTUS
LV.

Anno 1766 mense Novembri mulier 60 annorum pleuritide affecta est, & male habuit.

In hujus cubito adversæ partis secta vena, ex eademque tantum sanguinis missum est, quantum vires concedebant: præstitum item julapium refrigerans cum nitro & oxymelle est, decoctum etiam ex mollibus herbis; victus quoque tenuis. Imposita affecto lateri fomenta emollientia sunt.

His nihil, nisi tenax mucus, tussiendo extractum est. Quarto die emplastra vesicatoria brachiis cruribusque applicata sunt, latissimum vero lateri in quo dolor pressit. Item gummi ammoniacum julapio adjectum est, quod sputum expelleret. At frustra. mansit namque & idem dolor, & spirandi difficultas, & pulsus frequens, & urina flammea, neque secuta sputa cocta sunt.

Quare die sexto extractum corticis peruviani mixturæ adjeci; scilicet ut ex eo ægra drachmas sex per viginti quatuor horas assumat. Inde minutus febris ardor est, moderataque tussis. Accessit somnus, cutis sudore
imma-




immaduit; urina turbida evenit, & sedimentum lateri trito simile præcipitavit; arteriarum pulsus mollis factus est, & quo ægra plus corticis assumsit eo magis ad integritatem pervenit. Deinde convaleuit post quindecim dies.

Recuperatis viribus mulier, cum erecta obambulasset, multa sputa cocta facile & liberaliter ejecit.

Anno 1766 initio Veris faber scriniarius, ÆGROTUS LVI. 50 annorum, pleuritide correptus est. Ejus vena iterum iterumque secta est, extractus sanguis tenaci crusta tectus erat. Præstitum julapium refrigerans, potusque est. Impositi affecto lateri foci emollientes sunt.

Arteriarum pulsus frequens erat, urina flammea, spiritus difficilis, sputum tenax ruffum. Accesserunt quinto die deliria, inquietudines, factaque lingua arida est. Quare superiori julapio Extractum corticis peruviani adjeci. Inde calor remisit, post aliquot dies sudor incertis temporibus erupit, urina turbida evenit, & sedimentum lateri trito simile præcipitavit; paulo post æger convaleuit.

Superato morbo homo, cum somnum cepisset, & virium aliquantum recuperasset, sputum album coctum ejecit, & imposterum



absque notabili excreatione factus bene sanus est.

**ÆGROTUS
LVII.**

Anno 1766 eodem tempore juvenis frater ordinis S^{ti} Dominici pleuritide affectus est. Hujus vena sæpe, quoties nempe per vires & per febrim licuit, secta est: sanguis crustam, tenacem, albam habuit.

Præstitum julapium est, adjecto nitro & oxymelle; potus item refrigerans; imperatus victus tenuis, & impositus affecto lateri fofus mollis est.

Post quartum diem sputa ruffa, tenacia, cum labore evulsa sunt. Noctes inquietæ erant, accessit delirium, urina flammea evenit.

Quare julapio Extractum corticis peruviani adjeci; quod & febrim & delirium extinxit. Post, cutis sæpe sudore immaduit, urina turbida evenit & sedimentum lateri trito simile præcipitavit: pulsus factus mollis est, urina urinæ sanorum similis, noctu requies erat. Secuta sputa cocta sunt, cum æger convalesceret.

Ut sanguinis crusta siquidem ea per convalescentiam cocta est, intra bonam valetudinem sputo ejicitur, ita eadem hoc ipso valetudinis tempore etiam per alias vias eliminatur

minatur, id est per has, per quas intra sanitatem mucus excerni consuescit; nempe per intestinorum glandulas, e quibus vel sponte ejicitur, vel pharmaci purgantis adminiculo extrahitur: suntque istæ alvi sedes meracæ, mucos plenæ, & talia continentes, qualia cocta per sputum ab aliis ejiciuntur. Talem mucum alvo emisit ægri de quibus paulo ante (capite quinto) dixi, quorum morbi statum ibidem relegere juvat. His aliqua istius exitus exempla nunc jungam.

Anno 1774 mense Martio Equiso pleuritis tentatus est. Sanguinem misit, qui non crassa sed pelle tectus erat. Julapium cum oxymelle simplici atque decoctum refrigerans sumsit. AEGROTUS
LVIII.

Altero die arteriarum pulsus & plenus & mollis fieri cæpit, secus ac is in tali morbo esse consuescit. Equidem tertio die nulla resolutio erat: quare emplastrum vesicatorium affecto loco imposui.

A medio quinti diei multus sudor erupit; exeunte eodem die urina turbida evenit cum sedimento lateri trito simili, simul & omnis dolor atque tussis deleti sunt. Sexto die idem sudor, eadem urina. Ad exitum septimi diei



urina cocta cum nubecula, ut sanorum urina; perfectaue valetudo.

Huic die duodecimo, quo homo bene valebat & viribus satis pollebat, laxans pharmacum præstiti, quod plurimum mucum coctum subduxit.

ÆGROTUS
LIX.


Anno 1767 medio mense Decembri Equiso pleuritidem in dextro latere accepit. Hujus vena altero die secta est; tertio item, extractusque ex ea sanguis crustam habuit. Præstita medicamenta refrigerantia sunt, & imperatus victus tenuis est; impositaque affecto lateri fomenta sunt.

Quarto die, quoniam pulsus convulsivus mansit & urina cruda fuit, emplastrum vesicatorium latum affectæ plagæ imposui, & julapio semunciam Extracti corticis peruviani adjeci.

Quinto die largus sudor erupit, qui imposterum continuavit: urina turbida evenit & sedimentum lateri trito simile præcipitavit. Hinc noctu requies erat.

Die nono item largus similisque sudor erupit, qui ægrum doloris expertem reliquit. Imposterum intra liberam respirationem sputa cocta exierunt.

Post



Post hæc reconvalescens bibit per tres septimanas aquas Selteranas tepidas mane adjecto saccharo: post quas bene habuit.

Post sex deinde septimanas, cum homo erectus obambulasset & aëre, ut sanus quisque, usus fuisset, alvi profluvium cum tenesmo accepit, quod multa mucosa excussit: quæ quod reliquæ crustæ fuerint, credibile est.

Anno 1781 die 1 Novembris juvenis mulier Pleuritide correpta est. Sanguis e vena missus densam crustam habuit. Judicata est die nono per sudorem & per urinam. Tringinta tribus post morbi finem diebus orta tormina sunt & largum alvi profluvium, quod plurimum mucum coctum album sine stercore excussit.


AEGROTUS
LX.

Anno 1783 die 17 Februarii vir 60 annorum Peripneumonia vera affectus est, sanguis omnino densam crustam habuit. Judicatus est quinto & septimo die per sudorem & per urinam, quæ sedimentum lateri trito simile præcipitavit. Sputo nihil ejecit.

AEGROTUS
LXI.

Decimo quarto post finitum morbum die tormina accepit & alvi fluxum, quo plurimus mucus coctus excussus est. Deinde laxans dedi, quod item multum mucum subtraxit.

Rursum



Rursum die 17 Martii tormina accepit; ob quæ item laxans pharmacum ei præstiti: quod item multum mucum eduxit.

Nonnunquam ista crusta, posteaquam ea per convalescentiam cocta est, sputo non ejicitur, neque alvo emittitur, sed per diversos abscessus expellitur. Ita servus sellarius, & aulæ sutor furunculos acceperunt, qui crustæ reliquias expulerunt.

AEGROTUS
LXII.

Anno 1777 mense Julio filius architecti, puer malesani corporis habitus & multis circum genu fistulis ab infantia affectus, Pleuritide correptus est. Evenit medicinæ beneficio absque sputo. Intra convalescentiam orti multi abscessus in dorso sunt.


Similiter per bubones crustæ exitus fit.

AEGROTUS
LXIII.

Anno 1767 die 22 Maji Nauta quinquaginta annos natus, primum frigore deinde calore & acerba simul tussi correptus est, cum spiritus difficultate, angustis, & acuto in medio sterni dolore: sitim & os amarum habuit; arteriarum pulsum frequentem.

Huic julapium refrigerans cum oxymelle, refrigerans etiam decoctum & victum tenuem imperavi. Sexta altero die iterum vena est, iterumque quantum vires ferebant.

Ex-



Extractus primus sanguis ruber mansit, alter crustam albam lardaceam habuit, tertius magis tenacem.

Tertio die arteriarum pulsus frequens, celer, irritatus erat: ex quo judicavi, quod quarta die sputum coctum non futurum sit. Accessit delirium non adeo pertinax, mansit pulsus irritatus in nonum usque diem; tussis acerbâ nil nisi sputum tenax cum labore trahens.

Quarto die Extractum corticis peruviani julapio adjeci. Secutum alvi frequens profluvium est, putrida, non cocta trahens: b) facta angusta respiratio est cum frequente abdominis motu: erat cum his cutis arida, & ingens sitis.

Septimo die insudationes soporque. A nono die in undecimum usque largus sudor erupit, post quem arteriarum pulsus mollis & lentus evenit: secuta requies est, factus spiritus liber, & extinctus calor est.

Die undecimo turbæ vespери, duodecimo rursus requies.

Huc-

b) „ A pleuritide aut peripneumonia occupato, alvi profluvium accedens, malum. „ Hipp. Sect. VI. aphor. 16.



Hucusque urina non turbida facta est, sed pedetentim ex rubra flava evenit, qualem sanus quisque habere consuevit. Tussis vero ipsa, uti quotidie corticis plus assumptum est, ita in vexa demisit.

Post turbas orta die decimo tertio stranguria est cum doloribus in regione renali urinam absque sedimento trahens. Imposita renibus fomenta sunt, quæ nihil secutum est: siquidem die decimo quarto neque in renibus neque intra mingendum dolor supererat; contra vero, urina clara atque pellucida exiit.

Die decimo quinto eruperunt in diversis corporis partibus furunculi atque sub alis bubones, quibus imposita cataplasmata suppurantia sunt. Educto purè æger prospere valuit.


Istius ægri crises omnes imparibus diebus factæ sunt.

Possunt etiam plures tales crises altera alteram sequi.

AEGROTUS
LXIV.

Anno 1767 die 15 Aprilis vir 62 annos-natus, & qui ab anno hucusque vitiati corporis habitus erat, incidit in Peripneumoniā, quem morbum, propterea quod initio is parvus erat, vilipendit, neque vena secta est. Interea crevit malum.

Tertio



Tertio die in auxilium vocatus venam fecari jussi, julapium refrigerans cum oxymelle & nitro imperavi, simile decoctum Potui dedi victum tenuem.


Missus e vena sanguis primus tenax erat, alter crustam inflammatoriam habuit. Arteriarum pulsus frequens & celer erat.

Quarto die missus iterum sanguis est, qui crusta lardacea tectus erat: arteriarum pulsus irritatus esse continuavit. Per quæ signa prævidi, quod ante finem quarti diei nullum sputum coctum futurum sit: quæ res intra vulgarem medendi methodum pessimo omini esse consuevit. Quare emplastra vesicatoria lata quinque locis imposui, & superiori julapio extracti corticis peruviani drachmas sex, quas æger intra viginti quatuor horas assumeret, adjeci.

Accessit quinto die delirium, somnus turbatus est, noctes inquietæ erant, dies similiter: arteriarum pulsus irritatus erat; tussis acerba nil nisi sputum tenax cum labore trahens.

Septimo die sudor largus erupit in alterum usque diem, urina turbida facta est, & sedimentum lateri trito simile præcipitavit.

Inde



Inde pulsus mollis factus est, tussis mitior evenit, accessit somnus & recta mens.

Erat iste sudor istaque urina ipsius febris crisis.

Post istam crisin alvus laxa evenit & multa mucosa excussit.

Erat ista crisis crustæ coctæ.

Tussis finem habuit atque æger post corticem peruvianam convaluit. Cumque bona valetudo magis constitisset, eruperunt in diversis externi corporis partibus furunculi.

Erat ista altera crustæ coctæ crisis.

Postremo cum perfecta valetudo constitisset, secuta sputa cocta sunt, quæ liberaliter & absque labore exierunt.

Hæc tertia crustæ coctæ crisis erat.

Sic quidem crusta per convalescentiam e corpore exit: non illa solum, quam sanguis intra pleuritidem contraxit, sed etiam omnis ea crusta, quam sanguis in cæteris morbis inflammatoriis quibuscunque accepit: in febre ardente, in angina, in phlegmone, in malo panaritio cum zona, in febre scarlatina &c. de qua quidem crusta, & de ejus exitu imposterum, si vita supersit, multa notatu digna proponam: nova profecto & hucusque incognita.




CAPUT VII.

Febris pleuritica cujus generis sit?

Supra per Experimenta demonstravi, pleuritidem veram fieri, quoties ejus febris materia in latus incidit; contra vero pleuritidem rursum eximi suamque febrim extinguï quoties hæc ipsa materia sive ad humerum ascendit, sive per labia exulceratur, sive cocta tertio vel quinto vel septimo vel nono vel undecimo die per sudorem atque per turbidam urinam exitum e corpore sumit: & vice versa, eandem febrim eundemque acutum lateris dolorem excitari; quando eadem materia, quæ ante in humero residebat, nunc in latus descendit in eodemque suam sedem figit: Ictèrum vero, si ipsa e latere in hepâr se præcipitat. Nunc perquirendum est, ista febris cujus generis sit? vel, quod idem est, hæc materia, quæ istam pleuriticam febrim excitat, cujus indolis sit?

Ut id exequar, utar item, quemadmodum hucusque consuevi, experimentis, non theoriæ fuco. Incipiam a cognitis.

Omnibus medicis practicis notum atque expertum est, febrim intermittentem eos dimittere, quorum labia exulcerantur. Suspi-




catur Hippócrates etiam cæteras febres, in quibus labia exulcerantur, intermittentes esse. c) Si pleuriticorum labia, ut supra indicavi, exulcerantur, ægri protinus expertes pleuritidis sunt.

Post unamquamque febris intermittens, si regularis ea est, accessionem multus sudor, acidum olens, ex universo corpore erumpit, & urina turbida evenit quæ sedimentum lateri trito simile præcipitat. Ista urina & iste sudor febris intermittenti præ cæteris proprii sunt. Per talem urinam, ut recte Sydenhamius monuit, febrim intermittentem etiam obscurissimam detegimus. Similis sudor similisque urina intra pleuritidem, si eidem recte medemur, erumpunt, atque pleuritidem cum febre extinguunt.

Febres intermittentes post tres, post quinque, post septem, ad summum post novem accessiones desistere Hippocrates dixit. Ita sæpius contingit, vernaes quam si autumnales febres sunt; sæpius item si tertianæ, quam si quartanæ eadem sunt. Contingit autem ita in universum persæpe.

Simi-

e) „ Febres, in quibus exulcerantur labia, fortassis intermittentes. „ De morb. popul. Lib.VII. Sect.VIII.



Similiter pleuritis vel per se vel cum recte adhibitis auxiliis post tres, post quinque, post septem, ad summum post novem vel undecim dies finem sumit, per sudorem nempe atque per turbidam urinam, quæ sedimentum lateri trito simile præcipitat. Debent autem continentis pleuriticæ febris dies veluti totidem intermittentis accessiones, si eæ invicem conjunctæ essent, numerari.


Qui acidum eructant, non facile febre intermittente corripuntur. Ita experientia. Similiter, acidum eructantes expertes pleuritis manent. *d)*

Qui febre topica laborare consuecunt, hi, veluti per 38 annos observavi, intermittente regulari quemadmodum cæteri homines non corripuntur. Virgo ter intra triginta annos dolorem juxta dimidiam eandem capitis partem habebat, qui alternis diebus eadem hora accessit; nunquam vero febre ordinata, ut cæteri homines, affecta est; etsi interea febris intermittens sæpe popularis fuisset.

G 2

Simi-

d) „ Acidum ructum habentes non ita valde pleuritici
„ fiunt. „ Hipp. Sect. VI. Aphor. 33.



Similiter qui pleuritide sæpe affecti fuerunt, febris intermittentis expertes esse consueverunt. Monialis virgo, de qua supra dixi, ter per diversos annos pleuritide affecta fuit, nunquam vero intra triginta duos annos, quod scio, febre intermittente correpta est: etsi in eodem monasterio suæ sociæ febre intermittente laborare consuescant. Contrarium vero, si recens morbus est, sæpe videmus. Intra multos hucusque annos pleuritis simul & febris intermittens populares erant; eodemque ipso tempore alios febris intermittens alios pleuritis prehendit: alii ex intermittente in pleuritidem deciderunt.

Anno 1769 mense Martio procul in Majum mensem usque pleuritis popularis erat; in eademque multi, qui per febrem intermittentem incæperant, delapsi sunt: multi etiam sine tali febre facti pleuritici sunt: utrique pleuritici similiter laborabant, similem dolorem, similem calorem, sanguinis crustam similem habebant: nulla inter utrosque pleuriticos differentia morbi erat. Ex istis pleuriticis alii altero die, alii tertio die exulcerata labia acceperunt; quemadmodum intra ipsam febrem intermittentem. Etiam talia labiorum ulcera contigerunt his, qui in istam pleuritidem absque febre intermittente deciderunt.

Horum



Horum item alii perfecte alii imperfecte ex istis ulceribus judicati fuere, perinde ac in febribus intermittentibus exquisitis. Cuncti vero, ut talia oris ulcera acceperunt, dolorem ex latere modo omnem amiserunt, modo plurimum tantum.

Supervacuum foret multa istius constitutionis epidemicæ atque curationis exempla adducere. Aliqua satis erunt.


Juvenis coquus febre tertiana exquisita laborabat. Post duas accessiones tartarum emeticum assumsit; post tertiam accessiōnem purgatus est pulvere jalapæ. At eodem die, qui intercalaris erat, pleuritide in sinistro latere affectus est.

AEGROTUS
LXV.

Missus e cubiti vena sanguis ter est;isque crusta lardacea tectus erat. Præstitum julapium refrigerans decoctumque est, & imperata diæta est. Initio tertii diei extractum corticis peruviani julapio adjeci, & emplastrum vesicatorium affectæ plagæ imposui.

Quinto die sudor acidus erupit, qui omnem & dolorem, & tussim, & calorem, sine spūto discussit: ægerque lectum septimo die deseruit.

Ita quindecim dies homo bene sanus erat; nunc vero iterum in intermittentem recidit.



Quod recidivæ genus, siquidem intermittens versa in continentem febrim est, perraro contingit.


ÆGROTUS
LXVI.

Anno 1782 mense Augusto, quo tempore popularis tertiana febris erat, Virgo 20 annorum febre inordinata laborabat, quam octo fere dies reticuit, pharmacorum fuga. Postremo, cum succubisset, meum petiit consilium.

Huic medicamentum vomitorium præstiti; quod multam bilem excussit: deinde purgans pharmacum, a quo multa impura secesserunt. Post hæc febris (quemadmodum fieri consuescit) ordinari debuisset: at contra: namque eodem die, quo febris accedere debuisset, ægram Pleuritis veraprehendit.

Secta nunc bis vena est, missusque sanguis crustæ aliquantum habuit. Applicatum ad affectum latus emplastrum vesicatorium est, præstitaque, ut cæteris pleuriticis, medicamenta sunt. Pleuritis tres continuos dies occupavit: quarto requies erat: quinto & septimo die accessiones tertianæ febris regulares revererunt. Quam febrim deinde tertianam exquisitam pulvere radicis Gei urbani excussi.

Anno



Anno 1785 ad exitum mensis Aprilis ser-
va vera pleuritide affecta est. Missus sanguis
crustam lardaceam habuit. Perfec̃te judicata
est diebus quinto & septimo per sudorem &
per urinam quæ turbata est, & sedimentum
lateri trito simile præcipitavit. Medio men-
se Majo ipsa in tertianam exquisitam incidit.

AEGROTUS
LXVII.


Famulus Pleuritide vera affectus est ad
exitum mensis Aprilis 1783. Judicatus est
septimo die. Autumno anni 1784 incidit in
febrim intermittentem quartanam: sanatus
est. Mense Februario anni 1785 Pleuritide
vera correptus est. Judicabatur quinto &
septimo die. Mense Aprili relapsus in quar-
tanam est.

AEGROTUS
LXVIII.

Anno 1765 exeunte æstate puer quin-
quennis febre intermittente modo quotidiana,
modo tertiana, modo quartana, hacque mo-
do simplici modo duplici laborabat, nunc post
adhibita auxilia carebat iterum, donec ita
trahendo durum lienis tumorem accepisset.
Sub finem autumnii expulsa per corticem
peruvianum febris quidem est; attamen re-
mansit & durus lienis tumor, & malus ali-
quandiu corporis habitus.

AEGROTUS
LXIX.

Initio sequentis hyemis eum pleuritis
prehendit, inque affecto latere vehemens do-



lor preffit cum tussi ficca, laborioſa reſpiratione, arteriarum celeri pulſu, exacerbatione febrili circa veſperum, genis rubris atque delirio.

Quare ſecta bis vena eſt; ex eademque miſſus ſanguis cruſtam habuit. Impoſitæ affecto lateri molles herbæ ex aqua coctæ, data medicamenta refrigerantia, cum ſorbitionibus, & applicata emplaſtra veſicatoria ſunt: abſque proſectu. Itaque ſuperioribus auxiliis corticem peruvianum adjeci, qui ægrum & proxime eripuit & durum lienis tumorem excuſſit, & corpus recidivis vacuum effecit.

Anno 1779 menſe Martio atque per Aprilis initium tempeſtas ficca erat: nihilominus juxta nos febres tertianæ, etſi non adeo multæ, tamen populares erant ipſæque, veluti Vere conſueſcunt, poſt tres aut poſt quinque circuitus finem acceperunt. Eadem quoque tempeſtate aliqui pleuritide correpti ſunt; quæ item, quemadmodum febris tertiana ipſa, ad exitum tertii diei ſimiliter deſiit, poſt urinam nempe turbidam quæ ſedimentum lateri trito ſimile depoſuerat; atque poſt ſudorem, qui acidum odorem habebat.

Notum inſuper eſt; multos, qui febre intermittente autumnali laboraverant, & per



corticem peruvianum sanati fuere, proximo Vere in eandem febrim recidere, eademque tunc post tres, maxime vero post quinque accessiones absque medicinæ auxilio liberari. Ita aliqui ex his, qui superiore autumnō febre intermittente laborabant, proximo Vere non tali febre sed Pleuritide affecti sunt, eademque item ad exitum tertii diei per sudorem atque urinam turbidam similiter liberati sunt.

A medio mense Novembri anni 1774 procul ultra Februarium anni 1775 hyems humida erat; intra quam nonnunquam per aliquot dies intensum frigus pluviam exceperat. Intra istam tempestatem nemo, quantum ego scire potui, febre intermittente correptus est. Sex vero pleuritide tentati sunt: unus asthmaticus, alter anhelus tibicen, navita, virgo, sartoris uxor, & pedagogus: omnes eadem curandi ratione habiti per similes crises evenerunt. Postremo uxoris atque pedagogi pleuritis versa in febrim intermittentem exquisitam est: quemadmodum nonnunquam viceversa febris intermittens ipsa in pleuritidem mutatur.

Anno 1751 & 1752 popularis pleuritis erat, hæcque modo cum intermittente febre

erat, modo cum continente, modo per labiorum ulcera finem accepit, modo ipsa orta ex longa intermittente est, modo in intermittentem abiit, modo post annum similiter ut intermittens quæque reversa est. e)


Neque ignotus acutus ille lateris dolor est, qui certum circuitum habet, & cum febris tertianæ accessione incipit, iterum intermitte, iterumque cum proxima accessione revertitur; neque, nisi excussa febre desistit. f)

Per quæ experimenta ad credendum inducimur, Pleuritidem æque ac febrim intermittentem similem causam agnoscere: putoque posse eandem causam, siquidem ea humoribus insinuat se, aut in excretis quæ intus retenta sunt, nidulatur, intermittentem efficere: contra vero si solidis partibus ea infigitur, inflammationem localem excitare: veluti id multa experimenta docent. Ita posse eandem quoties ipsa in membranam pulmones succingentem incidit, pleuritidem statuere: denique alium atque alium morbum ostendere, prout ea in aliam atque aliam

cor-

e) Vid. observ. de febr. interm. L. II, Cap. IV.


f) Vid. ibidem.



corporis partem incidit: sic in latere cantoris, de quo capite quinto dixi, pleuritidem effecit: Iterum, ut ex eodem latere in hepar descendit; postremo cum hepar dimisit, febrim intermittentem exquisitam excitavit, quæ post septem circuitus exitum sumsit.

Pari ratione modoque anno 1770 initio mensis Martii ortus ex eadem ipsa materia Catarrhus epidemicus est, cum coriza, angina, acerbæ tussi, & magna febre. Iste morbus diu cum adhibitis communibus remediis traxit. Non pauci absque ratione passi recidivam sunt. Nonnullorum exulcerata oris labia sunt, indeque minutus quidem non vero extinctus morbus est. Neque sputum puriforme, etiam si ægri ejicerunt, quidquam juvit: juvit autem sudor largus acidum odorem habens, & urina turbida quæ sedimentum lateri trito simile præcipitavit. Istorum ægrorum alii, posteaquam ita duos dies male habebant, in pleuritidem veram absque manifesta ratione inciderunt, & cortice peruviano sanati sunt. Qui vero ab ista pleuritide revenerunt, hi neque traxerunt imposterum, neque recidivam passi sunt.

Idem magis anno 1782 patebat; intra quem popularis quidam Catarrhus omnes Europæ



Europæ gentes corripuerat, & ipse diversam larvam admisit, sub qua & medicos vehementer fefellit; & non paucos ægros præcipitavit. Veluti alibi a me scriptum est. g)


CAPUT VIII.

De diebus criticis.

Nunc de diebus criticis, intra quos pleuritis sub mea curatione judicari consuescit, scribere operæ pretium est, & ante videre, num perfectæ crises imparibus diebus contingant, imperfectæ vero aut malæ in dies pares incidant? Quæ observatio & perutilis & ad confirmandam cum Hippocratis sententiam, tum meam quoque curandi rationem necessaria est.

Magnam imparium dierum rationem Hippocrates habuit: adeo, ut intra eosdem & plurimos morbos judicari & ipsos magis ad

g) Dissertatio de Catarrho epidemico anni 1782 Moguntix 1784. Equidem in istam Dissertationem nuper inepte declamavit abortivus quidam censor; abundantia bilis & scientiæ penuria (Allgemeine deutsche Bibliothek, des 64 Bandes 1 Stück 74 S.) Verum hunc (cujus præterea & miseret & pudet) persequi cum dignitas operis prohibet, tum festinatio, ut ea explicem, quæ exorsus sum.



ad commodum terminari contenderit. Id
Asclepiades ut vanum repudiavit. *h)*

Ascle.

h) „ Est autem alia etiam de diebus ipsis dubitatio, quo-
„ niam antiqui potissimum impares sequebantur,
„ eosque, tanquam tunc de ægris judicaretur,
„ *κρείττους* nominabant. Hi erant dies tertius, quin-
„ tus, septimus, nonus, undecimus, quartus deci-
„ mus, unus & vigesimus; ita ut summa potentia
„ septimo, deinde quarto decimo, deinde uni &
„ vigesimo daretur. Igitur sic ægros nutriebant, ut
„ dierum imparium accessiones expectarent: deinde
„ postea cibum, quasi levioribus accessionibus in-
„ stantibus, darent: adeo ut Hippocrates, si alio
„ die febris desisset, recedivam timere sit solitus.

„ Id Asclepiades jure ut vanum repudiavit: neque in
„ ullo die, quia par imparve esset, ægris vel majus,
„ vel minus periculum esse dixit. Interdum enim
„ pejores dies pares fiunt, & opportunius post fe-
„ brium accessiones cibus datur. Nonnunquam etiam
„ in ipso morbo dierum ratio mutatur; fitque gra-
„ vior, qui remissior esse consueverat. Atque ipse
„ quartus decimus par est, in quo esse magnam vim
„ antiqui fatebantur. Qui cum octavum primi na-
„ turam habere contenderent, ut ab eo secundus
„ septenarius inciperet, ipsi sibi repugnabant, non
„ octavum neque decimum, neque duodecimum
„ diem sumendo, quasi potentiores: plus enim
„ tribuebant nono, & undecimo. Quod cum fecif-
„ sent sine ulla probabili ratione, ab undecimo non
„ ad tertium decimum, sed ad quartum decimum
„ transibant. Est etiam apud Hippocratem, ei,
„ quem septimus dies liberaturus sit, quartum esse
„ gravissimum. Ita, illo quoque Authore, in die
„ pari & gravior febris esse potest, & certa futuri


„ nota,



Asclepiadem secuti multi impostherum medici sunt: attamen non pauci fidenter Hippocrati adhæserunt. Sed etiam inter ipsos hos iterum disputatur; nempe si incerta initia morbus habeat, a quo tempore diēs numerari debeant: an a quo die æger malehabere incepit? an a tempore quo opprimi a morbo æger incipiat? Contra alii non dies sed accessiones vel exacerbationes numerari debere sustinent; ut dierum computus cum Hippocratis numerandi ratione conveniat. *i)* Ego, nullius addictus opinioni &, veluti hucusque

„ nota. Atque idem alio loco quartum quoque diem,
 „ ut in utrumque efficacissimum apprehendit; id est,
 „ quartum, septimum, undecimum, quartum decimum,
 „ decimum septimum, in quo ab impari ad
 „ paris rationem tranlit. Et ne in hoc quidem positum
 „ conservavit; cum a septimo die undecimus non quartus,
 „ sed quintus fit. Adeo apparet,
 „ quacunque ratione ad numerum respexerimus,
 „ nihil rationis, sub illo quidem authore reperiri.
 „ Verum in his quidem antiquos tunc celebres admodum
 „ Pythagorici numeri fefellerunt: cum hic quoque medicus
 „ non numerare dies debeat, sed ipsas accessiones
 „ intueri; & ex his conjectare, quando dandus
 „ cibus sit. „ A. C. Celsus L. III. Cap. 5.

i) „ Quæ diebus paribus exacerbantur, paribus judi-
 „ cantur. Quorum autem exacerbationes in imparibus
 „ fiunt, ea in imparibus judicantur. „ Hipp. Lib. I. de morb. popul. Sect. III. Nro 35.



usque affuevi, procul a theoriæ disputationibus existimo; ad istam rei medicæ perquisitionem atque ad statuendam firmandamque veritatem tales febres exempli causa assumi debere, quæ certum initium habent; deindeque videre, utrum harum bonæ crises in impares dies incidant, malæ vero imperfectæve paribus diebus contingant? Ad istam disquisitionem nulla febris magis apta atque opportuna est; quam vel intermittens exquisita, vel ipsa pleuritis: utpote per quas certa notitia haberi potest, quando numerari per accessiones debeat, quando per dies. Incipiam ab intermittente: deinde ad continentem veniam.

Itaque (quod Hippocrates posuit, & omnibus medicis practicis notum atque perspectum est) febres intermittentes exquisitæ tribus, quinque, septem ad summum novem circuitibus, imparibus nempe, absolvuntur. Ita vernales magis quam autumnales febres, sæpius item tertianæ, quam quartanæ: nihilominus idem per alterutram tempestatem sæpe cum utrisque febribus obtinet; adeo ut medicus, si artifex est, post imparem aliquam talem accessionem certo prædicere possit, aliquane an nulla imposterum accessio futura sit. Neque unquam ego vidi (neque fortassis quis-



quisquam alius vidit) aliquam talem febrim post quatuor, post sex, post octo, aut post aliam quamcunque parem accessionem finem sine recidiva sumfisse; neque factas tales bonas solutiones per pares accessiones fuisse, quales per impares contingere consuefcunt. k)

Hoc ut palam apud medicos constet, opus est, ut ipsi temporis dies cum accessionum numero comparent: & tunc profecto videbunt, quod nulla crisis bona sit; quoties ea vel pari die contingat, vel cum pari accessione conveniat; neque etiam, si impar temporis dies in parem febris accessionem incidat; sed contra semper bonas istas crises esse, quoties impar temporis dies cum impari accessione conveniat. Id per cifras ante oculos ostendam. Sit itaque tertiana febris; fintque.

{ febris accessiones	1'	2'	3'	4'	5'	6'	7'	8'	9'
{ temporis dies	1	3	5	7	9	11	13	15	17

Facta tali comparatione videmus; quod eæ accessiones, quæ impares cum imparibus temporis diebus coincidunt, sponte desistant; cæteræ vero pares accessiones, quæ cum imparibus

k) Vide observationes de febribus intermittentibus. Offenbaci 1785.




paribus temporis diebus conveniunt; aut impares accessiones, quæ in pares dies incidunt, nunquam per se cessent.

Similiter quartana febris non desistit, quoties temporis par dies cum pari aliqua accessione convenerit: contra vero desistet eadem quoties impar dies in imparem accessionem incidit. Sint itaque exempli gratia

{	febris accessiones	1'	2'	3'	4'	5'	6'	7'	8'	9'
	temporis dies	1	4	7	10	13	16	19	22	25

Per impares tales accessiones, quæ numerari debent, febres intermittentes judicantur. At, si continens febris est, ejus non exacerbationes sed dies numerari iidemque, ut recte Sydenhamius monuit, tanquam totidem febris intermittentis accessiones sibi invicem junctæ haberi debent: & tunc videbimus; quod febris continens post totidem dies judicetur, post quot accessiones febris intermittens judicari consuevit: nempe tertio, quinto, septimo, nono die. Id palam in febre pleuritica est, quæ manifestum initium habet, a quo certo numerari dies possunt. Vidimus enim supra, & per experimenta demonstravimus, pleuritidem vel tertio die per sudorem atque urinam turbi-



dam perfecte judicari; vel quinto & septimo simul; nonnunquam nono, quandoque etiam undecimo die: imparibus nempe diebus, veluti Hippocrates voluit.


Præter sudorem atque urinam turbidam alias adhuc bonas crises Pleuritis recipit, quas superiore capite quinto & sexto indicavi; & quæ item imparibus diebus contingerunt.

Supereſt ut videamus; an Hippocrates, ſi alio die, ſcilicet pari, febris deſiſſet, recidivam jure timuêrit? Ut id demonſtrem, utar item his quæ in una eademque febre, in ipſa eadem Pleuritide, cum iisdem ipſis auxiliis, atque per eandem curandi rationem expertus ſum. En exempla.

ÆGROTUS
LXX.

Annò 1768 die 13 Martii mulier 40 annos nata pleuritide correpta eſt. Miſſus e vena ſanguis mucoſus, lividus, non coherens erat; ſimilis item qui veſperi extractus eſt; qui vero ſanguis altero die miſſus eſt, cruſtam habuit. Lateri impoſita fomenta emollientia ſunt, præſtitumque julapium atque decoctum refrigerans eſt.

Initio tertii diei emplaſtrum veſicatorium dolenti plagæ imponi juſſi: extracti corticis
femi-



femiunciam julapio adjeci, quale intra viginti quatuor horas bis consumat.

A medio die quarto multus sudor acidus erupit, & urina turbida evenit cum sedimento lateri trito simili: quam crisin non profuturam sed contra in longius tracturum morbum esse ideo prædixi, quoniam ista crisis die pari contigit. *l*) Et profecto crevit calor, urina tenuis aquosa evenit, quam Hippocrates in isto morbo tanquam exitiosam damnat: *m*) Accessit delirium etiam cum adhibito cortice.


Denique exeunte decimo diē sudor multus olens erupit, & tum urina turbida evenit cum sedimento lateri trito simili: quæ altera crisis item die pari morbum finivit:

H 2

diffi-

l) „ Sudores febricitanti si incæperint, boni sunt tertia, die, & quinta, & septima, & nona, & undecima, „ & decima quarta, & decima septima, & vigesima „ prima, & vigesima septima, & trigesima prima, „ & trigesima septima; hi enim sudores morbos „ judicant. Qui vero non sic fiunt, dolorem signi- „ fican, & longitudinem morbi, & recidivas. „ Hipp. Lib. Aphor. Sect. IV. Aphor. 36.

m) „ At peripneumoniciis perniciofa (urina) est, quæ „ in principio quidem coacta est, post quartam vero „ diem attenuatur. „ Lib. de hæmoac. prænot. Sect. III. v. 5.



difficilius utique & cum multo majore labore, quam si imparibus diebus eadem crises, ut cæteris ægris supra, contigissent.


Intra convalescentiam orta nausea atque vomendi desiderium est. Accepta manna (vomere enim, ut debuisset, ægra noluit) multum muci cocti alvo exiit: quæ medicina, cum aliquoties repetita fuisset, integram valetudinem confirmavit.

ÆGROTUS
LXXI.

Anno 1769 die 17 Martii vir annos circiter 36 natus, crassus, malehabere cepit cum frigore, calore, nausea, & spiritu compresso. Huic suus medicus, nescio qua similitudine recti, vomitorium dedit, postero die purgans pharmacum. Inter hæc difficilior spiritus evenit & acutus in dextro latere juxta septimam costam dolor magis pressit. n)

Ex hujus vena sanguinem hoc die bis traxi, qui crustam tenacem accepit. Julapium item & decoctum, quale supra, dedi. Tertio die item sanguinem misi, qui crustam habuit.

n) „ Scomphus in Oeniadis pleuritide correptus, mortuus est. Septima delirus Pharmacum autem bibit infra purgans, priore ante potionem die mentis compos erat, & purgatus est non multum, cum antem purgaretur, deliravit. „ Hipp. de morb. popul. Lib. V. v. 1.




habuit. Pulsus celer & frequens permanfit, urina flammea, noctu subdelirium, inquietudines. Emplaſtrum veficatorium latum affecto lateri impoſui, & extractum corticis julapio adjeci. Secutum levamen eſt.

Intra quartum diem (parem) multus ſudor acidus erupit, qui ad ſeptimum uſque continuavit, & non juvit. At ſeptimo die idem ſudor liberaliter exceſſit: poſteaſque turbata urina eſt, & ſedimentum lateri trito ſimile præcipitavit; inde pulſus mollis & plenus evenit; dolor diſſipatus eſt, factus liber ſpiritus eſt, ſine tuſſi & abſque ſputo; noctu ſomnus; rurſum urina ſanorum urinæ ſimilis; deſiit ſudor poſt; & æger octavo die lectum deſeruit, cibos deſiderans ſanus.

Eſſi autem iſtum ægrum bona criſis, quæ in ſeptimum (imparem) diem incidit, ſicque malam quarti (paris) diei criſin correxit, juviſſet; tamen ipſe, cum vires conſtare cæpiſſent, œdematoſos pedes accepit. Huic purgans pharmacum præſtiti, quod, cum multum muci cocti ſubtraxiſſet, œdema diſſipavit.

Anno 1770 die 26 Januarii ſamulus, qui ^{ÆGROTUS} ante aliquot annos pleuritide laborabat, & ^{LXXII.} tertio die judicabatur, nunc iterum in eandem



incidit. Incepit frigere, post incaluit magna febre cum acuto in sinistro latere dolore.

Extractus e vena sanguis crustam habuit; extractus postero die sanguis crustæ expers erat. Adhibita eadem curandi ratio atque applicatum Vesicatorium est. Tussis mitescere cæpit: sputi parum, idque tenax crudumque excretum est.


Die quarto sudor acidus erupit, qui tussim simul & dolorem submovit: febris autem continuavit.

Die octavo ortum rursus frigus est; secutus calor & magna febris novusque dolor nunc in adverso dextro latere recidivus est. Igitur sexta iterum vena est, & sanguis similem crustam habuit; at, qui altero die missus est, iterum crustæ, ut ante, similiter expers erat. Adhibita eadem iterum curandi ratio est; Emplastrum vesicatorium item.

Die 5^{to} recidivæ multus sudor acidus erupit, & turbata urina est, quæ sedimentum lateri trito simile præcipitavit.

Die recidivæ 7^{mo} similis sudor erupit, qui per plures dies continuavit & ægrum absque sputo integræ sanitati restituit.

Iste morbus initio judicatus est pari die quarto, & secuta recidiva est. Recidiva autem



tem ipsa imparibus diebus 5^{to} & 7^{mo} judicata est, & morbus non reversus sed ex toto expunctus est. o)

Anno 1776 ad exitum mensis Octobris, ^{AEGROTUS} quo tempore pleuritis popularis erat, vir ^{LXXIII.} 60 annorum in eundem morbum incidit.

Die secundo sudatiunculæ erant, & urina turbida evenit cum sedimento lateri trito simili. Missus per paucas portiones sanguis est; isque non adeo densam crustam habebat. Igitur vesperi diei tertii latum emplastrum vesicatorium affectæ plagæ imposui, & extractum corticis julapio adjeci.


Die quarto similis sudor erupit, similisque urina, ac die secundo evenit. Ob quas críticas evacuationes, quoniam eæ paribus diebus contingere, quod morbus ultra septem dies tracturus sit, prædixi.

Pejor morbus devenit; accessit delirium. Octavo die sanguinis item discum misi; qui totus omnisque in crustam abiit, viridis ex flavo coloris, granula ut vetus mel habentem: quæ crustarum pessima est. Vesperi

H 4

em-

o) „Febrientem si non in diebus imparibus febris dimiserit, recidivare solet. „ Hipp. Lib. Aphor. Sect. IV. Aphor. 61.



emplastrum vesicatorium inter scapulas positum est; quod traxit.

Tandem die nono sudor acidus ex universa corporis cute erupit, & turbata urina est, quæ sedimentum lateri trito simile præcipitavit: post quam crisin, quoniam ea (impari) nono die contigit, æger protinus sanatus est; proximeque vires recuperavit. Iste autem æger nullum mucum sive sputo sive alvo emisit. Ejus vero pedes, secus ac eorum qui diebus imparibus judicati fuere, facti œdematosi sunt; e quibus impofterum aqua, quæ hucusque inter eorum cutim erat, sponte per urinam secessit.

AEGROTUS
LXXIV.

Anno 1769 die 21 Maji aulæ sutor 40 annos natus pleuritide correptus est. Is simili, qua cæteri, curandi ratione habebatur.

Erupit pari die ex ejus cute sudor acidus, & urina turbida evenit cum sedimento lateri trito simili. Morbus traxit in alteram septimanam; secus ac eorum, qui imparibus diebus judicati fuere.

Intra tertiam septimanam, cum vires constare cæpissent, quatuor magni furunculi, duo e dextra, unus e sinistra nate alter e dorso eruperunt, & ægrum integræ sanitati reddiderunt.

Annó



Anno 1771 sub finem Aprilis auriga pleu- AEGROTUS
LXXV.
ritide affectus est. Sanguis crustam habebat.
Adhibita eadem, quæ supra indicavi, auxilia
sunt.

Sexto die multus sudor acidus ex cute
erupit; & turbata urina est, quæ sedimentum
lateri trito simile deposuit. Traxit morbus.

Cum vires constare cæpissent, & æger
surrexisset, is sputum puriforme ejecit, &
urinam puriformem emisit. Intra convales-
centiam pedes & scrotum facta œdematosa
sunt. Tempore & per obambulationem in
aprico discussum œdema est, & æger perfecte
convaleuit.

Frater laicus, vir 50 annorum, qui supe- AEGROTUS
LXXVI.
riore anno pleuritide laboraverat, & quinto
septimoque die perfecte judicatus fuit, nunc
idem anno 1780 die 6 Decembris in eundem
morbum recidit. Missus e vena sanguis crus-
tam habuit. Sputa cruda erant. Erupit octa-
vo die (pari) multus sudor acidus; urina tur-
bida facta est cum sedimento lateri trito simili.
Die decimo (item pari) similis crisis erat.
Convaleuit difficulter. Intra convalescentiam
plus quam centum parvos furunculos in dorsi
cute accepit cum uno magno abscessu. Diu
traxit, & pedes œdematosos accepit.



ÆGROTUS

LXXVII.

Anno 1780 mense Januario incidit in Pleuritidem juvenis mulier : dolor in dextro latere erat : judicabatur quinto & septimo die per sudorem atque per urinam ; ita perfecte convaluit.

Hæc relapsa in eundem morbum exeunte ipso anno est : dolor fixus in eodem latere erat : judicabatur per sudorem octavo (pari die). Inde remansit tussis ; quæ initio quidem nihil, deinde vero sputum puriforme absque profectu emolita est : vana etiam erant pectoralia medicamenta quæque. Ortus imposterum, mense Aprili 1781, magnus juxta labiorum oris commissuram furunculus est ; qui protinus siccatus parum juvit, & durum in cute nodum reliquit.

Supervenit mense Majo febris intermittens quotidiana exquisita, intra ejus accessiones antiquus lateris dolor per circuitum recrudit. Tertia accessio (veluti prædixi) major prioribus erat ; post eandemque multus sudor erupit ; & urina sedimentum lateri trito simile præcipitavit. Inde tussis protinus desiit. Post quintam accessionem, quæ item major erat, similis sudor similisque urina erupit. Aegraque perfecte convaluit absque ullo medicamento : durus item furunculi



culi nodus, qui hucusque remanserat, simul deletus est. Ita perfectæ crises, quæ imparibus febris intermittens accessionibus contigerunt, ea vitia excusserunt, quæ imperfecta crisis diei octavi intra pleuritidem ante reliquerat. Nonne eadem ipsa materia, & illam pleuritidem & istam febrim intermittentem excitavit? a qua post imperfectam pari die crisin aliquæ reliquæ remanserunt, quæ tussim continuarunt? Utique post perfectam crisin expulsæ istæ reliquæ sunt per impares febris intermittens accessiones.

„ Morbus regius fit aliquando criticos,
„ id est, judicatorie. „ p)

„ Quibus in febris morbus regius septima aut nona aut decima quarta accedit
„ bonum, si non præcordium dextrum durum fiat: sin minus, non bonum. „ q)

„ Quibus in febris morbus regius fit
„ ante septimum diem, malum. „ r)


Id perpetuum est: nisi malam crisin, quæ die pari antecessit, imposterum bona, quæ impari die sequitur, priorem corrigat.

Anno

p) Galenus in 4to Libr. aphor. aph. 62.

q) Hipp. ibidem aph. 64.

r) Hipp. aphor. Lib. Sect. IV. aph. 62.



AEGROTUS
LXXVIII.

Anno 1783 die 27 Aprilis, vir 60 annorum Pleuritide vera affectus est. Missus e vena, iterumque missus sanguis ruber, sanorum sanguini similis erat.

Aeger quinto die non judicatus est: sed contra in calore vehementer exarsit. Nunc missus sanguis crustam densam atque pertinacem habuit.

Supervenit sexto (pari) die Icterus, qui universam corporis cutim perflavo colore tinxit. Intra istum Icterum æger exitiose habuit; calore exarsit, & extreme tussit. Sputa cruda, tenacia, & viridia erant; urina transparens bile remixta. Et quo diutius Icterus insedit, eo magis facta viridia sputa sunt; extracto cicutæ vulgaris similia colore.

Medio die septimo largus ex universa corporis cute sudor erupit, qui in octavum usque continuavit, calidus, viscidus, acidum odorem habens. Intra istum sudorem flavus e cute evanuit color, ipsaque cutis quam proxime alba evenit, facta expers flavi coloris urina est, neque supererat sive tussis sive sputum, arteriarum pulsus mollis & plenus erat, homoque bene habuit.

AEGROTUS
LXXIX.

Anno 1784 die 15 Februarii incidit in veram Pleuritidem mulier. Dolor in sinistro latere

latere erat. Accessit quarto die (pari) isterus, universa corporis cutis flava erat; inque oculis id, quod album esse debet, tinctum flavo colore erat. Urina bile remixta est: sputum, hucusque crudum, profunde flavo colore imbutum erat.


Aegra quinto die erumnose habuit, acerbe tussit absque profectu: supervenit delirium.

At medio septimo die plurimus sudor erupit, qui duodecim horas continuavit: octavo sudor item non adeo multus: nono vero die plurimus item sudor ad exitum istius diei omnem morbum tulit & ægram ad integritatem perduxit.

Quodsi vero impofterum impari die bona crisis malam, quæ pari antecessit, non sequatur; actum de ægro est; idemque pari die extinguitur.

Anno 1780 die 12 Maji vir 73 annorum, ÆGROTUS
LXXX. sanguineus & a sua pueritia vitiati hucusque pectoris, primum frigore deinde calore correptus est, cum dolore dextri lateris in qua parte antiquum vitium vexabat: secta vena est, præstitaque pro ratione medicamenta sunt. Quarto die aurigine tincta cutis est. s)
Crevit

s) „ Quibus in febribus morbus regius fit ante septimum
„ diem, malum. „ Hipp. Sect. IV. aphor. 62.



Crevit indies colore aurigò. Aeger sexto die obiit. Aurigo die pari accessit; mors item die pari.

ÆGROTUS
LXXXI.

Anno 1781 die 2 Aprilis mulier 43 annorum ex sanguinis frequenti sputo phthysica evenit; & exesis carnibus contabuit amissis viribus; non insons miasmatis venerei. Hanc sexto mense gravidam Pleuritisprehendit: quam morbi complicationem Hippocrates lethalem pronunciavit. t) Dolor in postica costarum regione infra scapulam erat.

Abortum fecit tertio die: quinto orta lacticis febris est; quæ lochia retinuit; intraque istam febrem ægra vehementer exarsit, non autem sudavit. Sudavit vero sexto (pari) die per horas tres; indeque alleviata est; lochia profluxerunt, simul & urina multa. Mortua est die (pari) duodecimo.

His consideratis, & per ista curationum exempla patet; quod febrium crise, quæ pari die contingunt, sive malæ sive imperfectæ sint: bonæ vero atque perfectæ eæ, quæ in impares dies incidunt: verumque esse constat, quod Hippocrates dierum criticorum ratione nobis reliquit.

Nihil-



Nihilominus neque & hoc prætereundum est, quod in tanta ægrorum turba per 34 hucusque annos aliqui (quinque scilicet) etiam impari die obierint, tamen omnes item absque crisi.

Mulier ætate supra 40 annos ob vehemens sanguinis ex utero profluvium, quod quatuordecim menses traxerat, hydropica evenit. Cohibitus sanguinis fluxus pulsusque hydrops est. Convalescentem pleuritis, quæ ea tempestate popularis erat, in sua cameraprehendit. Dolor in dextro latere sextam inter & septimam costam erat. Obiit tertio die.

ÆGROTUS
LXXXII.


In aperto per dissectionem thorace utrimque aquæ pellucidæ circiter uncix sex erant. Pleura, -quo loco dolor pungebat, absque noxa & sanæ pleuræ simillima erat. Contra, in eodem loco extima pulmonis pars plagam sphacelo corruptam, rotundam, plus quam pollicem diametro emensam habebat.

Anno 1776 mense Decembri hortulanus, strenuus a longis hucusque annis vini generosi potator, cujus quotidie viginti libras pro consuetudine hauriebat; & nonnisi salsa, heluonibus grata; esui habebat, incidit in pleuritidem.

ÆGROTUS
LXXXIII.

Eum quarto die accepi. Sanguis e vena missus crustam habuit. Applicatum affecto loco

em-



emplastrum vesicatorium est. Quinto die sputum coctum evenit; sudor post: sexto die eum vires defecerunt: septimo sphacelosus obiit.

ÆGROTUS
LXXXIV.

Senecio 73 annorum, peregrinus, quem curæ atque sollicitudines diu multumque exagitaverant, & quem sæpe cibus sæpe etiam reficiens potus defecerat, miserrime degens incidit in pleuritidem. Non adeo acerbus iste lateris dolor erat: imo initio sanguinis striæ (bonæ notæ) sputo immixtæ erant. *u)*

Sanguinis discos duos misit, supra quem mucī parum erat. Arteriarum pulsus vesperi durus erat, ob quem eodem tempore extractus unus sanguinis discus est, qui mucī plus habebat.

Ad exitum tertii diei erant animi deliquia, arteriarum pulsus exilis & inæqualis, extremitates frigidæ, sphacelus. Septima die mors. *x)*


Atque hi quinque isti pleuritici fuerunt, qui inter quamplurimos alios a longis hucusque annis sub mea cura obierunt. *y)*

Huc-

u) „ Sputum autem flavum, sanguine permixtum non
„ multo, si in pulmonis inflammatione, in principio
„ morbi rejiciatur, salutare est, & valde prodest. „
Hipp. Lib. prænot. v. 13.

x) „ Oportet autem animadvertere, & nosse, in his tem-
„ poribus judicationes futuras esse ad salutem, aut
„ mortem, aut inclinationes ad melius, aut deterius. „
Hipp. Lib. I. de morb. popul. Sect. 3.

y) „ Utpote cum repugnante natura nihil medicina pro-
„ ficiat. „ A. C. Celsus Lib. III. Cap. 1.



Hucusque ad confirmandum Hippocratis de diebus criticis sententiam satis.

Inest profecto naturæ ingens & prorsus admiranda crises perficiendi vis & veluti sagacitas; per quam non eum tantum morbum, qui primus occupavit, superat; sed & alterum, si quis superveniat, vincit: quæ victoria ægris saluti simul & contemplanti medico dulci gaudio gratoque spectaculo est. Hoc etsi nonnunquam in diversis morbis, qui conveniunt, videri possit, nihilominus non inutile esse existimo, si unicum tale pleuritidis exemplum hic posuero, notatu profecto dignum.


Anno 1773 die 3 Maji, qua tempestate ÆGROTUS
LXXXV. pleuritis & juxta & circum nos popularis erat, juvenis & sanguine plena mulier, de qua superiore capite quarto dixi, pleuritide tentata est, cum ipsa sex & dimidium menses gravida esset. 2)

Initio secundi diei in auxilium vocatus tres sanguinis discos e vena misi, qui crustam lardaceam habebat. Julapium atque decoctum refrigerans præstiti; fomenta emollientia dolenti lateri imposita sunt: inditum item quandoque, ut opus erat, enema emolliens est.

I

Post

2) „Pleuritis, sive lateris inflammatio, in muliere gravida, lethalis est. „ Hipp. Lib. I. de morb. Nro 3.



Post duas horas sanguinis item discum misi, qui crusta lardacea tectus erat: medioque eodem die rursus sanguinis discum unum, qui similem crustam habebat. Erat spiritus extreme angustus. Itaque emplastrum vesicatorium latum affectæ plagæ imposui, & extractum corticis peruviani julepio adjeci.


Ad medium tertii diei dolor dorsum versus progressus est; quem transitum medici tanquam exitiosum damnant. a) Erat corporis calor summus & cutis ardens: ob quem ardorem sanguinis item discum unum misi, qui densissimam crustam habebat.

Ad exitum tertii diei ægra abortum fecit: neque istum secutus sanguis neque lochia sunt: quod malum omen erat.

A medio quinto die largus sudor, acidum olens, ex universa cute erupit cum levamine. Verum post quatuor horas febris lactis, quam metuebam, accessit; eademque novum in latere dolorem suscitavit simul & omnem sudorem delevit, totumque corpus nunc aridum ardensque erat.

Attamen (quod observatu maxime dignum est) idem sudor ad exitum ejusdem quinti diei

a) Vid. Lommii observ. Lib. II. de vitii pectoris.




diei rursus liberaliter erupit cum juvamine. Sudavit etiam ægra sexto die. A medio septimo vero die plurimus sudor ex universa corporis cute erupit, ægramque protinus ad integram sanitatem absque spuito restituit.

Reparata sanitate mulier Lochia, quemadmodum a recenti partu, emisit.

Istæ crises & ipse partus in dies impares inciderunt. Neque potuit ipsa lactis febris, quæ supervenit, crisin, etsi eam ad exiguum quoddam tempus suppressisset, tamen eandem necquicquam delere. Contra, erupit paulo post idem sudor, totumque morbum vicit. Tanta enim est naturæ in perficiendis crifibus virtus!

Ut autem natura morbum, qui est, itemque eum qui incidit, vincit; ita eadem non raro morbum simul & adversam medendi methodum superat atque nihilominus suas quandoque crises perficit. Hoc si ita contingit, solent medici victoriam suæ curationi attribuere, quam ipsi naturæ debent. Ita medicus nonnulli, quoniam aliquos suos pleuriticos post medicamentum vomitorium evenisse videbant, pleuritidis curationem ab emetico incipiendam esse statuunt: fortassis Hippocratis sententia, quam male acceperunt,



runt, ita persuasi. *b)* Quodsi autem saburra in ventriculo non resideat, vomere nil juvat; sed contra potest vomitus quassando pectus inflammationem exacerbare, sicque morbum pejorem efficere. Debet igitur medicus ante nosse an purgatione opus sit, ut per vomitum pleuritis curationi aptior reddi queat.

Contra alii, qui moliendo sputa pleuritidis curationem ordiri atque perficere malunt, dolores supra septum transversum, qui purgatione opus habent, sursum quidem versus purgatione indigere concedunt; non autem ad id vomitorio medicamento utendum esse, sed his quæ in isto morbo sputa expellant; sicque pulmonem sursum versus purgent. Hic enim purgare idem esse ac liberare ab his quæ contra naturam in pectore sunt. Ita etiam puris evacuationem sæpe purgationis nomen accepisse.

Rursum alii pleuriticis medicamenta alvum vacuantia dare eademque curationi aliquoties interponere volunt; per quæ vitiatu humor subtrahatur. Et isti quoque suos imitatores habent. Verum etiam hi a recto absunt:

b) „ Dolores supra septum transversum, qui purgatione
 „ opus habent, sursum versus purgatione indigere
 „ significant, qui vero infra, deorsum. „ Hipp. lib.
 „ Aphor. Sect. IV. aphor. 18.


absunt: nisi enim saburra in imo ventre recumbat, quæ cæteras crises intus retinere possit, purgatio per alvum nocet. Ipsa enim sputum, si quod coctum futurum esset, cohibet; & sudorem, qui morbum judicaturus esset, retrahit; sicque salutare naturæ conamen pessumdat. c)

Verum hi quod falsi fuerint specie recti, satis per decursum istius libri a me demonstratum est.

Interea quique, etsi sibi ipsis repugnantes ad sua experimenta refugiunt; singuli suas clamant observationes: quisque idem, quod cernit, diversum ab aliis habet; suum quisque certum putat, vultuque. Veluti qui ipsum eundemque politum ex variegato juglantis ligno asserem conspiciunt, alter in eo vespertilionis imaginem, alter fauni faciem, alter hedi caput, fluvium sub ponte alter videre sibi persuadet: postremo diversus item alter nihil horum, sed ductos contra diductosque sine ordine atque confusos tractus cernit. Similis illusio in diversa multorum morborum contemplatione suos fautores

I 3 medi-

c) „ A pleuritide aut peripneumonia occupato alvi pro-
 „ fluvium accedens, malum. „ Aphor. 16. Sect. IV.
 „ Scomphus in Oeniadis pleuritide correptus, mor-
 „ tuus est septimo die. Pharmacum autem bibit infra
 „ purgans. „ Hipp. de Morb. popul. Lib. V.



medicos decepit. Ob quem fucum tot falsæ, diversæ, atque a Vero prorsus alienæ morborum imagines a scriptoribus delineatæ sunt, quæ ancipites efficere practicos medicos possent tirones vero in devia flectere.


Equidem ad ipsam curandi rationem nihil plus confert, quam experientia: ad ipsam vero experientiam nihil rectius ducit quam observatio. Verum recte observare quod opus quis labor sit, profecto pauci cognoscunt. Non enim satis est, etiam omnia quæ intra morbos videmus, notare; sed ad ea potissimum animum attendere opus est, qualia scire refert; utpote quæ ipsum morbi genium exprimunt atque intimam ejusdem & suam ipsius propriam indolem explicant palamque ostendunt: cætera, tanquam aliena, multis communia, numero, non re, ponderosa, proprius ut obfuscantia rescindi, & veluti tenebricosa procul inde rejici debent. “ Ille affideat necesse est, qui, quod solum opus est visurus est. „ d).

In qua quidem contemplationis parte Hippocrates, qui multa paucis verbis complexus est, omnes antecessit; & quem in tanta medicorum turba vix aliqui recte secuti sunt. Non enim satis est, præcepta didicisse quibus instruc-



structus observator esse debeat; aut normam mente retinuisse, secundum quam dirigi observatio recte queat; sed nosse plurimum interest, quo morbi tempore tali aliqua regula uti opus sit; & quam harum præcipue tunc adhibere oporteat. Docent equidem hæ regulæ atque ista præcepta, quomodo id, quod videmus aut videre debemus, notandum sit; ipsam vero oculorum aciem non præstant, per quam id, quod notatu dignum est, videamus; nisi nobis ipsis acute perspiciendi facultatem natura ipsa concesserit. Veluti militum Præfectus, etsi is omnes bellum ducendi regulas mente retinuerit, tamen, nisi eum natura ad acute videndum recteque discernendum aptum finxerit, ipse cum omnium regularum apparatu neque hostem cædet, sed ipse cæsus erit.

Ut enim poëta ita observator medicus non fit sed nascitur. Debet uterque acri ingenio præditus esse, magnam imaginationis vim atque persensibilem percipiendi facultatem habere, ut etiam a minimis, quasi ea trans microscopium magna vidisset, certius afficiatur; velocem mentis perspicaciam, nequa præceps occasio eum fugiat; severum judicium, ne quid falsi eundem decipiat; pictoriam insuper dexteritatem habere, ut id, quod recte vidit, per-



perfecta delineatione atque ex integra facie ejus imaginem ostendere calleat. Quas animi dotes, si eæ ita simul comprehensæ sint, non inique spiritum observatorem appellari posse existimo. Rarum profecto naturæ donum, quod paucis concessum est!

Ob quem defectum multi observationum (siquidem ita suam operam nominare amant) scriptores vana, supervacua, ad rem non pertinentia, longa & inania, morbo non propria, sed communia, sæpe falsa, non ea quæ videre debuissent, sed talia qualia per hypothesium fatuos ignes vidisse existimant, confuso circumstantiarum ordine atque incerto temporum termino per ambages in medium, protrahunt; quæ prosequi expertum lectorem tædet, perseverare tyronem nil juvat.

Neque enim satis est, rudi calculo delineasse morbum levique colore ejus communia indicasse; sed plurimum interest, privata quæque ejusdem lineamenta vivido colore consignare atque exprimere, eundemque, veluti pictor a pûero adolescentem, ab adolescente virum, a viro senem mutatis lineis atque suis cuique propriis coloribus distinguit, ita morbum per diversa sua stadia diversis verborum gradibus significare. Verum eheu! nimirum omnes similiter Pictores se esse existimant.



